

Kabon treid em i kago kalt - Namah P3

PM tok promis long helpim ol meri... P4

Lufa MP kirapim nupela laibreri bilding long Rongo P23



Wantok

Namba 1855 Wan Wik Mas 4 - 10, 2010 Niuspepa Bilong Yumi Ol PNG Stret! K1 tasol

Moti ripot no bikpela samting: Somare

Paul Zuvani i raitim

RIPOT bilong Inkwairi o Wok Painim i go insait long ronawe bilong Julian Moti long Papua Niugini na go long Solomon Ailan i liklik samting.

Em samting PNG i bin mekim planti flua (toktok) long em tasol ol Kot bilong Kwinslen, Australia i rausim.

Dispela em toktok bilong Prait Minista Gren Sif Se Michael Somare long taim em i bekim askim bilong Memba bilong Lae na Deputi Oposisen Lida Bart Phile-

mon long sapos em (Se Michael) bai tok aut long dispela ripot long Kibung bilong Palamen long dispela wik.

Se Michael i tok Inkwairi i go insait long Moti i samting nating we em bai putim ples klia.

"Yes...ol ripot em i kamap pinis. Kabinet I tok orait pinis long ol."

"Mi bai bringim kamap ples klia dispela ol ripot."

"I gat narapela inkwairi (Moti Inkwairi) we i kamap ausait long Palamen."

"Dispela em (Julian) Moti toktok na Kuwinslen Kot i rausim pinis."

"Em samting dispela kantri i mekim flaua long em tasol Kwinslen Kot i rausim," Se Michael i tok.

Dispela ripot em Ombudsmen Komisen i kamapim na pasin Se Michael i mekim i bihainim tasol lo em Ombudsmen Komisen i askim Palamen long mekim.

Tasol maski long dispela Sif Ombudsmen Chronox Manek i tok LO bilong Australia i lo bilong PNG. PNG Ombudsmen Komisen bai mekim wok bilong en yet maski Australia Kot long Janu-

ari i tok Moti i nogat asua; Aninit long lo Komisen i tok Palamen Spika Jeffery Nape long Seksen 23 (1) (d) bilong Oganik Lo long Ombudsmen Komisen i mas tokaut long dispela ripot long Palamen namel long 8-pela de bilong kibung bilong en.

Na Ombudsmen Komisen aninit long Seksen 23 bilong Oganik Lo long Ombudsmen Komisen i bihainim dispela lo na i kamapim ripot na givim long Spika long em i tokaut long Palamen taim Palamen i holim kibung.

Moa Istory long pes 3

Baki no wanbel

POLIS Komisina, Gari Baki i no wanbel long ol ripot i kamap long niuspepa olsem biknem raskol man William Kapris i tokim polis i gat sampela minista na memba i helpim em long wok stil.

Komisina Baki, husat i kros tru long ripot long dispela sut toktok bilong Kapris, i tok em i no kisim wanpela toksave long ol dispela toktok, na i no stret long midia i autim ol dispela samting.

"Ol dispela sut toktok Kapris i mekim, em long wanpela hait intaviu wantaim polis. Tasol em i no stret long yumi autim ol dispela sut

'Mi no klia long sut toktok bilong Kapris'...

toktok long midia. Em bai daunim nating nem bilong ol lida bilong yumi na bagarapim luksave bilong ol long komyuniti.

"Olsem wanpela sitisen bilong PNG, Kapris i ken tok eni kain samting long laik bilong em. Tasol mipela, em ol midia na polis, i mas glasm gut na painimaut sapos em i tru tok o nogat pastaim long mipela i autim nating long ol arapela," Baki i tok.

Em i tok tu olsem i gat planti kain tokwin i raun olsem i gat sampela ol politisen i wok stap insait long wok stil bilong Kapris.

"Tasol mi yet olsem Komisina bilong Polis i no kisim wanpela brif long dispela ol sut toktok Kapris i mekim. Sapos i gat wanpela ripot olsem, mi no klia long en."

Mista Baki i askim midia long noken bihainim dispela kain 'kauboi'



Komisina Gary Baki -

niusman pasin we i no luksave long tru tok i gat as bilong en.

Intanet i kamap isi tru wantaim Prepaid BlackBerry.



Kisim tasol BlackBerry 8520 Gemini long K999! FREE Sabkripsin inap Mas 31

Digicel i kamautim Pre-paid BlackBerry Sevis.

Kisim FREE sabkripsin tete.

Ofa bai stap inap Mas 31.

Go lukim wanpela stua klistu long yu long kisim ma toksave!



Di rem na kondisen bilong Digicel i stap Fri sabkripsin bak go long olgeta nupela BlackBerry sabkripsin start long Februari 17 Igo Mas 31. Dispela sevis em wanlain osem olgeta BlackBerry masin em Digicel i saim. Ringim Komisina. Kea namba long 123 long kisim moa intanet.



Palamen no brukim wanpela lo

Paul Zuvani i raitim

PALAMEN i no brukim wanpela lo taim em i no bungim 63 de bilong ol kibung.

Na dispela i stap long han bilong Lida bilong Gavman Bisnis long wantaim em I askim long holim kibung na long wanem taim em surukim taim bilong kibung.

Lo long Palamen i tok Palamen bai holim ol kibung inap long 63 de.

Tasol long mekim samting tru ol de bai sot long dispela namba.

Dispela em tok bilong Praim Minista Se Michael Somare long taim em i bekim askim bilong Memba bilong Mosbi Not Wes na Lida bilong Oposisen Se Mekere Morauta long wanem as Somare i daunim namba bilong ol de bilong kibung long dispela yia i kam daun long 44 de tasol.

Se Mekere i tok taim Gavma i mekim olsem em i sot long 19 de long inapim 63 de bilong holim kibung.

Na em I askim sapos Se Michael i no laikim planti de orait em i gat inap namba long Palamen long senisim lo na daunim namba bilong ol de long Palamen i holim kibung i kam daun .

Tasol long bekim Se Michael i tok sapos wanpela i bihainim ol de we Palamen i holim ol kibung long wanpela wik dispela bai lukim olsem Palamen i holim kibung long foapela de tasol.

"Sori toktok bilong Palamen i holim kibung long 63 de i toktok i



Praim Minista Se Michael Somare.

stap long No Man's Len." "Wanpela wik i gat 7-pela de. Na long dispela Palamen i holim kibung long Tunde i go long Fraide."

"Sapos wanpela i kaunim namba bilong ol de long namba bilong ol wik we Palamen I holim kibung em bai painim olsem namba i sot long 63 em Mama Lo i toktok long em."

Long taim em i no bekim gut yet askim Se Mekere i mekim samplimentari askim na dispela i no go daun gut wantaim Somare na Somare i tok bek "Wanem em rabis 'damn' askim bilong yu."

Na Mekere i tok Suprim Kot i tokaut olsem Palamen i mas sindaun long 63 de kibung.

Tasol Michael i tok em i tru lo i stap tasol tok i stap long lo.

Long taim em i bekim yet



Oposisen Lida Se Mekere

Memba bilong Lae na Deputi Lida bilong Oposisen Bart Philemon i laik sanap na Se Michael i tok "yes boi" na Philemon i no amamas.

"Mi no boi, mi Memba bilong Lae na inap em (Somare) i tok sori long mi na tok stret."

Na Se Michael i tok sori na i tok sampela taim em i save seksek long bekim tok na olsem em i abrus long kolim Mista Philemon olsem boi.

Em i luksave long Philemon olsem em i Memba bilong Lae.

Se Michael i go moa long bekim askim bilong Se Mekere na i tok taim wanpela i bihainim stret namba bilong ol wik Palamen bai sot yet long kamap bilong dispela 63 de.

Se Mekere i tok taim Somare i mekim olsem em i brukim long ai bilong ol manmeri na dispela i no gutpela piksa long pablik.

Palamen Nius wantaim Paul Zuvani

Palamen no save sapos Aimo i Minista gen?

Tony Aimo, Memba bilong Ambunti



PALAMEN long aste i paul olgeta sapos saspenden Koreksinel Minista na Memba bilong Ambunti Drekkir Tony Aimo i kisim bek wok Ministri bilong en.

Dispela long wanem i nogat wanpela kliapela tok i kamap long Praim Minista Se Michael Somare i tok orait long Mista Aimo i kisim bek wok bilong en.

Se Michael i bin saspending Aimo long holim Ministri bilong en bihain long hevi bilong ol nem nogut kalabusman i ronawe long Boman Meksimum Sekyuriti Kalabus long Januari dispela yia.

Palamen i paul long taim Aimo i laik mekim sampela toktok bihainim askim bilong Memba bilong Laigam Porgera Philip Kikala long stretim sel (rural lokap) na haus kalabus long Laiagam.

Kikala i tok haus kalabus long Laiagam i save holim ol kalabusmanmeri long Enga

Provins tasol bikos dispela i no gutpela i mekim ol kalabusmanmeri long dispela hap i kam long Baisu Haus Kalabus long Mt Hagen.

Em i tok planti ol kalabusmanmeri long Baisu i bilong Enga na olsem i gutpela long Minista i stretim na Laiagam na kisim bek ol kalabusmanmeri bilong Enga i go bek long ples bilong ol.

Tasol taim Aimo i kirap na i laik bekim Deputi Spika Francis Marus i tok nogat long em long wanem Palamen i save olsem Praim Minista Se Michael Somare i saspending em long holim wok bilong en.

Na long dispela as Aimo i nogat atoriti long bekim dispela askim.

Long dispela taim tu Se Michael i no kam yet long sia bilong en long Samba.

Deputi Klak bilong Palamen Simon Ila i askim Deputi Praim Minista Se Dokta Puka

Temu sapos em i save sapos Aimo i kisim bek Ministri bilong en.

Long taim ol i mekim olsem ol i pulim taim bilong kibung na planti Memba i paul na Memba bilong Lae na Deputi Oposisen Lida Bart Philemon i kirap na mekim saplimenta askim na tokim Gavman long ol i stretim hevi bilong ol ausait bipo long ol i kam long Samba.

Bihain long dispela Se Puka i askim Mista Kikala sapos em i ken raitim ol askim bilong em long pepa bai Gavman i ken bekim gut.

Aimo yet i tok Se Michael i tok orait long em i kisim bek wok bilong en long Tunde.

Tasol nogat wanpela i save sapos dispela tok i tru o nogat o sapos Somare i raitim wanpela opisel pas na tokim Aimo olsem em i ken kisim bek wok bilong en.

Dispela i askim bilong Palamen.

Haus sik i salim ol sik manmeri long baim marasin long kemis

BIKPELA haus sik long kantri, em Pot Mosbi jenerel Haus sik insait long Nesenel Kapitel Distrik i sot long sampela marasin na ol samting bilong ol nupela bebi mama i karim long yusim long stretim ol.

Na i gat wari i stap bikos haus sik i wok long tokim ol sik manmeri na ol papamama bilong ol nupela bebi long baim ol marasin samting long kemis o famasi.

Na askim i bin go long Helt Minista, Sasa Zibe sapos em i save long dispela na wanem samting em i mekim long stretim dispela.

Memba bilong Anglimp Saut Waghi, Jamie-Maxtone Graham, i bin autim ol dis-

pela wari long dispela wik Tunde, em namba wan de bilong Palamen sindaun long dispela yia.

Mista Maxtone-Graham i autim bikpela wari long planti samting long haus sik i no stret, ol marasin na ol narapela samting i sot, longpela lain long ol sik manmeri i wet wantaim sori lukluk longpela taim long lukim dokta na kisim marasin.

"Mi bin raun i go long wod bilong ol pikinini long Pot Mosbi Jenerel Haus sik na mi sori tru. Longpela lain ol sik manmeri i wet na planti i luk sori. Wod bilong ol pikinini i sot long planti samting olsem marasin bilong givim long ol pikinini i gat sik pekpek wara long sampela

taim nau," Mista Maxtone Graham i tok.

Em i tok ol dokta na nes i wok long tokim ol siklain long go baim ol marasin long famasi we planti long ol i turangu na ol i no inap long baim ol marasin bikos prais bilong ol marasin long famasi i antap tumas.

Long bekim dispela askim na wari, Minista Zibe i bin tok tru, dispela i bikpela samting we Mista Maxtone Graham i askim long en, em i save long ol hevi na sot long ol marasin i kamap long Pot Mosbi haus sik na tu, long ol narapela haus sik insait long kantri.

Em i tok dispela ol samting i no bilong nau, tasol ol i stap insait long helt sistem

long 30 yias nau. Tasol em i tok dipatmen bilong em i wokim samting long traime stretim ol dispela samting.

"Stat yet mi kisim wok olsem Helt Minista, mipela i wokim sampela senis (reforms) long traime stretim ol hevi i stap longpela taim. Sampela long ol hevi em edministresen yet i ken stretim. Ol hevi i wankain long ol narapela haus sik long kantri.

Mista Maxtone Graham i tok dispela samting em i bikpela wari na minister i mas lukluk long em kwiktaim.

"Mi sanapim wanpela task fos long sait bilong tilim gut ol marasin bilong ol haus sik long ol provins," Minista Zibe i tok.

OXFORD, TOK PISIN INGLIS DIKSENERI

Katim, na pulimapim oda fom daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

TITLE	ISBN	PRICE	QTY	SUBTOTAL
PNG Tok Pisin English Dictionary	9780195551129	K38.50		

Non-refundable price correct at the time of printing and is subject to change without notice.

Options for Payment
1) Direct Deposit into Bank Account (Recommended)
2) Mail Payment to World Publishing Company Ltd, PO Box 1888, BORNEO, NCD
3) Cash into the office (Office 12, Section 18, Milneburg St, Waigani, NCD)

Account Name: World Publishing Company Ltd
Account Number: 100-000-5380
Bank: Bank of South Pacific Ltd
Branch: Commercial Centre
Branch Code: 9851
Swift Code: BOSPNCNM

FAX BACK TO: (675) 325 2579

Please an ordering item from category make correct of for please.
Phone: (675) 425 2580
Fax: (675) 325 2579
Email: world@world.com.pg

Name (print): _____
Address (print): _____
City: _____
State: _____
Postcode: _____
Country: _____
Signature: _____

Minista Tienstein putimaut sain-bot bilong 2010 Sensus

James Kila i raitim

MINISTA bilong Nesenel Plening, Paul Tienstein long dispela wik i lonsim nupela sain-bot o long tok-inglis ol i kolim bilbot long soim Senses 2010 long fran long het opis bilong Nesenel Statistikel Opis (NSO) long Mosbi.

Dairekta bilong NSO, Kit Ronga i amamas long tokaut olsem gavman i bin givim bikpela sapot tru long wok bilong Senses 2010.

Mista Ronga i tok olsem bikos long dispela ol gutpela sapot i lukim nau olgeta ol provins insait long kantri i wok long redim ol wok bilong ol long kaunim ol pipel long mun Julai long dispela yia. Ol manmeri na pikinini long pablik i go het yet long kisim infomesen i kam

long midia o ol niuslain long wanem ol nupela developmen i kamap long wok bilong senses long dispela yia.

Mista Ronga i tok amamas long gavman olsem sapot gavman i givim em i gutpela, na em i tok NSO bai strong long mekim gutpela wok long givim ol data o namba insait long wok em bai karimaut bihain long senses long mun Julai.

Stat long dispela wik Mande, NSO i bin karimaut wanpela wok tes i go insait long ol pepa bilong askim kwesten long ol pipel. Dispela prites i bin kamap long Kupiano insait long Abau distrik long Sentral provins.

Mista Ronga i tok dispela bilbot bai toksave long olgeta manmeri long nau na bihain taim olsem gavman i bin givim sapot long NSO long karimaut Senses insait long PNG.



SANAPIM SAIN: Ol wokman i putim sain long nupela bilbot pastaim long Minista Tienstein i lonsim long Mande. *Poto: Nicky Bernard*

Em i soim tu olsem dispela gavman bilong Somare-Temu i laik lukim gutpela wok i kamap long kisim stret ol namba na data long kamapim gutpela wok plen bilong kantri.

Em i tokaut klia tu olsem dispela pri tes we i stat long Mande na bai pinis long Fraide long Kupiano

em long traim na lukim wanem kain wok i ken kamap long sait bilong askim kwesten i go long ol wan wan haus na ol manmeri i stap insait long en.

Ol wokman bilong NSO bai i glasim ol kwesten pepa na mekim ol askim na tu luksave long save ol pipel i gat long sait bilong sensus na tu sapos ol i

save long rit na rait na kain samting olsem.

Bihain long dispela prites long Kupiano, ol wokman bai givim wanem ripot ol i kisim igo long Yusas Edvaisori Komiti (UAC) long mekim sampela kain rekomendesen o wanem moa wok i ken kamap long strongim Nesenel Senses 2010.

Moti ripot i no bikpela samting

I kam long pes 1

Dispela i bin toktok bilong Manek taim em i tokaut long tripela ripot em Komisen i givim long Spika long Januari dispela yia long Nape i mekim ples klia.

Narapela tupela ripot wantaim Julian Moti ripot we Komisen i givim em wok painim i go insait long makim bilong Hamish Sharp long Nesenel Maritaim Sefti Autoriti Bod (NMSAB) na long Polis i Masim ol Meri long 3 Mail Ges Haus i go long Boroko Polis Stesin.

Long ripot bilong Julian Moti askim i go olsem long las wik Australia kot i painim Moti i nogat asua na i fri man nau, olsem wanem Komisen i go het long askim Palamen long tokaut long dispela tok?

Long bekim Manek i tok lo bilong Australia em lo bilong Australia.

"Wanem samting i kamap long PNG i stap aninit long lo bilong PNG na olsem bihainim lo Komisen i mas kamapim ripot long dispela tok."

"Lo bilong Australia i kamap long ol samting i stap long Australia," Manek i tok.

Moti husat i Fiji India lo man tasol i sitisen bilong Australia em Solomon Ailan i makim em olsem Atoni Jenerol bilong en long taim Australia polis i tok em i gat asua.

Polis i tok Moti i mekim pasin nogut long wanpela 13-ya meri long Vanuatu long sampela 11-pela yia i go pinis taim em i stap long Vanuatu.

Long dispela as em i gat asua na i mas kamap bipo long Australia polis na bekim ol sas.

Tasol Moti i ronawe na kam long PNG bipo long em i go long Solomon Ailan.

Em i kam long PNG long taim Australia i givim oda long PNG polis long ol i holim pasim em.

Toktok bilong salim em i go long Australia i stap bipo long PNG Kot taim sampela opisa bilong ami i kisim balus bilong ami long Tunde moning bilong Oktoba 10, 2006 na kisim em i go long Solomon Ailan.

Kabon treid em i 'kago kalt' tasol - Namah

James Kila i raitim

KABON Tred em olsem 'kago kalt' tasol na ol papagraun insait long kantri i no ken seksek na sainim ol agrimen nating nating wantaim ol outsait lain.

Dispela em strongpela toktok Minista bilong Fores, Belden Namah i bin mekim long Mande long fran bilong ol lain papagraun bilong Is Pangia, husat i bin kam long Mosbi long lukim wanpela agrimen long Fores Menesmen Agrimen. Dispela agrimen em Nesenel Fores Atoriti wantaim developa Madang Timbas Limited i sainim long kamapim nambawan daun-strim timba projek long Hailans rijen insait long Pangia eria.

Mista Namah i tok olsem long nau yet nogat wanpela lo i stap long bihainim insait long kabon tred long PNG.

Em i tokim ol lain papagraun



EM I KLIA: Fores Minista Belden Nama i tok olsem kabon tred em i wankain tru olsem pasin 'kago kalt' tasol. *Poto:*

bilong Pangia husat i pulim lain i go long hetkwata bilong Nesenel Fores Atoriti (NFA) long Mosbi long lukim NFA i sainim agrimen wantaim developa, Madang Timbas long developim fores eria insait long Is Pangia long katim timba na tu bringim ol sevis i go long ol rurel pipel long dispela ples.

Mista Namah i tokim ol lain papagraun bilong Pangia olsem em yet em papagraun long wanpela fores eria long Vanimo-Grin na em i luksave long ol developmen na sevis we i kamap long fores developmen long eria bilong ol.

Minista bilong Pablik Sevis na Memba bilong lalibu-Pangia, Peter O'Neill, husat i gat sampela graun tu insait long dispela projek eria long Is Pangia i tokaut tu olsem kabon tred i no gat pepa long tokaut olsem wok long kamapim haus sik, skul na rot i stap long en. Olsem na ol pipel i noken seksek long kabon tred tumas.

Taim Minista Namah i tok olsem kabon tred em i 'kago kalt' tasol, sampela yangpela man bilong Pangia i sanap long get bilong NFA hetkwata na tok olsem ol i laikim kabon tred long go het long ples bilong ol.



Long las wik long namba wan mipela tokaut long wanem samting em i dispela sensus, wanem taim em i bin kamap, olsem wanem em i save helpim olgeta manmeri, gavman bai kaunim husat manmeri na ol arapela askim bilong dispela sensus.

Em gutpela long yu mas save olsem dispela sensus em wanpela bikpela samting tru long wok developmen bilong kantri. Sapos gavman ino save long haumas man na meri stap insait long dispela kantri bilong yumi wok bai ino inap kamap gut. Ol pipel bai ino inap long kisim gut ol sevis bilong gavman.

Tasol yumi mas save olsem gavman bilong yumi nau bin givim bikpela sapot tru long dispela sensus wea bai kamap long mun Julai 11 igo inap long 17 de.

Wantaim dispela sapot olgeta opisa bilong nesenel sensus ofis long Waigani na olgeta wokman bilong wanwan provins i wok redi gut tru bai dispela sensus i ken kamap moa gutpela tru na karim gut kaikai bilong em winim ol sensus bilong pastaim.

Sampela ol wok redi em olsem ol i save kolim (pre-test) or wok painim aut pastaim bai wok trutru ino ken go bagarap. Long Sentral Provins long Kupiano district, 10pela manmeri husat i bin kisim wan wik trening bai ol ken wokim dispela pritest long hap. Dispela pritest em bilong painimaut sapos ol dispela ol askim i igo stret na ino paulim tingting bilong man askim na tu ol lain husat bai askim ol kwesten. Em tu bilong painim haumas minit ol inap kisim long wanwan hauslain.

Wokpainimaut or pritest long Kupiano bai helpim Nesenel Sensus Opis (NSO) long sekim na streftim ol askim stap long dispela sensus fom. Dispela pritest em stat pinis long mande na pinis long dispela wik Fraide.

Sentral provins na NCD i bin kamapim ol stiarin komiti bilong kodinetim wok sensus long provins bilong tupelo. Provinsol gavman na administrasin bilong tupela bin soim traipela sapot long dispela komiti.

Stori tu kamap long nesenel opis olsem wanwan provinsel administrasin i givim sapot long ol na opim pinis sensus opis bilong provins.

Long astede Mande, Minista bilong nesenel Plening na Monitorin Mista Pol Tienstein i bin katim ribbon bilong luksave long dispela Sensus 2010 Sensus bilbot.

Long dispela taim, minista Tienstein tok olsem gavman bai sapotim dispela wok sensus bikos gavman bilong em bai givim moa sapot bai wok i ken pinis gut na karim gut kaikai.

Em tok moa olsem gavman mas save long haumas man, meri, pikinini, husat isave long rif na rait, husat ino save long rif na rait na moa bai gavman iken skelim gut ol sevis na moni bilong em.

Long dispela taim yet, ektim nesenel statision Mr Joe Aka tok olsem gavman bin helpim gut dispela wok na em na ol wokman bilong nesenel opis wok hat tu long pinisim wok wantaim long kamapim gutpela risalt bilong sensus.

Olsem mipela tokim yu pinis, olgeta radio stesin na ol nupela bai helpim long toksave long olgeta wok redi i nau na inap long taim sensus kamap long mun Julai.

Bishop Brothers for all your

PICK UP & DELIVERY SERVICE AVAILABLE POM & LAE BRANCHES

INDUSTRIAL AND HYDRAULIC HOSE AND FITTING REQUIREMENTS



BISHOP BROTHERS

Everything for industry

www.bishopbros.com.pg

Email: sales@bishopbros.com.pg



Branches Nationwide

PM tok promis long helpim

Michael Novingu i raitim

PRAIM Minister, Se Michael Somare i tok promis long helpim ol meri long kirapim wok bisnis long kirapim gutpela sindaun bilong ol long famili bilong ol komyuniti na Papua Niugini.

Husat i tok nogat long ol meri i wokim bisnis? Ol meri i gat strong long save long wokim bisnis.

Praim Minista Se Michael Somare i mekim dispela toktok long Meri Wokim Bisnis bung (Women in Business) long Lae las wiken.

Se Michael i askim ol papa long sapotim ol meri



Ol meri lalibu long Sauten Hailens i welkamim PM long Lae. Foto: Bustin Anzu

bilong ol long kirapim bisnis i mas go het long gutpela bilong famili, ol na kantri wantaim long kisim

sevis i go long ol arapela. Em i tok dispela em i namba wan taim long dispela kain bung i kamap

long ol meri long soim save bilong ol long wokim bisnis, moa yet em i askim ol meri long noken kros

pait namel long ol yet, wokbung wantaim long kisim sevis i go long ol manmeri long komyuniti bilong ol.

Se Michel i tok gavman i tok orait long helpim ol meri wantaim K10 milien long ol bai statim bisnis bilong ol. Dispela mani ol i putim i stap long Nesanel Maikro beng.

"Mi bai sapotim ol meri long wokim bisnis tasol ol man yupela i mas sapotim ol meri bilong yupela long wokim bisnis," Se Michael i tok.

Em i tokim ol meri ol i mas wok hat na wok bung wantaim long kirapim developmen bilong Papua

Niugini i go het.

Em i tok kalsa bilong Papua Niugini yumi save daunim ol meri, nogat yumi noken daunim ol i save wok hat long givim kaikai bilong mipela.

Se Michael i tokim ol meri olsem em bai toktok wantaim Deputi Praim Minista na minista lukautim graun long givim hap graun long kirapim opis bilong ol meri long Pot Mosbi.

Se Michael i wokabaut lukluk raun long ol haus ol meri i salim klos, laplap, mat na planti arapela samting em amamas long lukim ol meri i ken wokim bisnis.



Gabriel Kapris i sekim sampela prodak bilong ol meri Hailens. Foto: Bustin Anzu

Komes, Tred na Industri tu redi

Michael Novingu i raitim

GAVMAN, aninit long Dipatmen bilong Komes, Tred na industri bai givim helpim long ol meri long kirapim wok bisnis long kisim developmen i go long ol busples long kirapim gutpela sindaun long komyuniti bilong ol.

Memba bilong Maprik, na Minista bilong Komes, Treid na industri, Gabriel Kapris i mekim dispela toktok long pasim bung bilong ol meri wokim bisnis (Women in Business) bung long Lae las wiken.

Mista Kapris i tokim ol meri i kam bung long expo bilong ol olsem em i amamas long lukim ol meri i soim planti samting ol yet i kamapim long salim, kisim mani long lukautim sindaun bilong ol.

Mi tokim ol meri olsem em bai wok bung wantaim Praim Minista long lukim wok bisnis bilong ol meri bai gavman i givim mani long helpim ol long go het long wok bisnis bilong ol.

Mista Kapris i tok gavman i givim K10 milien long wok bilong kirapim wok bisnis bilong ol meri i go long Nesanel Maikro Benk long ol meri bai kisim dinau long kirapim wok bisnis.

Em i tok ol meri mas holim han na wok bung wantaim long developim kantri bilong yumi long inapim driman bilong gavman 2050 long mak bilong kamapim developmen long Papua Niugini.

Mista Kapris i askim ol papa long sapotim ol meri bilong ol long wokim bisnis long kisim sevis i go long ol manmeri long kirapim gutpela sindaun bilong ol.

Ol meri laikim gavman i stretim rot na bris

ASKIM i go long gavman long stretim rot, bris, haus sik, lo na oda bilong ol meri long busples long kisim ol kes krop bilong ol i kam salim long taun.

Mama bilong Maunten Wilhem ges haus na Wespak benk, Meri Wokim Bisnis awod wina, Betty Higgins, i mekim dispela toktok long meri wokim bisnis ekspo long Lae las wiken.

Misis Higgins i tok em i kirapim ges haus, lukautim pis long Maunt Wilhem. Rot na bris i bagarap i lukim nogat kastoma i kam baim ol sevis bilong mi.

Em i askim gavman long stretim rot na bris long kisim developmen i go long ol bus ples long kirapim gutpela sindaun bilong ol.

Misis Higgins i tok gavman mas mekim isi long ol ples meri long kisim dinau long benk long kirapim wok bisnis long wanem sampela meri i no save long rit na rait.

"Wokim ol samting mipela i kamapim long Papua Niugini bai kirapim wok long ol yangpela manmeri long eben, rurel hap long lusim pasin raskol long kamapim gutpela sindaun bilong ol," Misis Higgins i tok.

Misis Higgins i askim gavman long wokim opis bilong ol meri long Lae long lukautim ol meri long hailans, Momase, Niugini ailan i laik statim wok bisnis.



Polismeri Cathy Rimbao i joinim ol lain bilong em Sepik. Foto: Bustin Anzu

Gavman bai helpim ol meri long ples long statim bisnis bilong ol

BOSMERI bilong opis long Rurel Developmen long Hailans rijen, Anna Bae, i tokim ol meri i kam long meri wokim bisnis bung long Lae las wiken olsem i gat mani i stap long opis bilong em long ol meri long kisim dinau long statim bisnis bilong ol.

Misis Bae i took opis bilong em i wok wantaim gavman long helpim kirapim gutpela sindaun bilong ol manmeri long ol komyuniti bilong ol.

Em i tok opis bilong em i stap long givim helpim long ol manmeri bilong palling kirapim wok bisnis long lukautim sindaun bilong ol.

Misis Bae i tok aninit long Sevis Impruvmen Progrem (DSIP), gavman i givim K14 milien long ol distrik, K1 milien ol i makim long kirapim na impruvim sindaun bilong ol manmeri long ples.

"Ol meri i ken kisim dispela moni long kirapim wok bisnis sapos ol i bi-

hainim trupela na stretpela pasin long kisim mani long helpim ol kari-maut wok bisnis bilong ol," Misis Bae i tok.

Misis Bae i tok bikpela samting em ol meri i ken kamapim grup bilong ol wokbung wantaim long wokim bisnis em opis bilong em i ken helpim ol.

Em i tok em i sori long lukim ol meri long ples i laik wokim bisnis we nogat ol gutpela samting olsem rot, arapela samting i stap long helpim ol.

Digicel opim opis wantaim nupela stail na lukluk

James Kila i raitim



KATIM: Sif Eksekutiv Opisa bilong Digicel (PNG), John Mangos i sanap na katim rop long opim gen nupela fleg opis bilong Digicel long daun-taun Mosbi wantaim tupela naispela meri i sanap long sait. *Poto: Nicky Bernard.*

DIGICEL (PNG) long Mande dispela wik i opim wanpela opis bilong en long Mosbi wantaim nupela stail long givim gutpela sevis i go long ol kastoma bilong en.

Dispela bikpela mobail netwok long Papua Niugini i stretim gut na opim fleg-stua bilong en long Daun Taun Mosbi.

Dispela naispela retpela kala i soim koporet flegsip kala bilong Digicel long taim bilong lonsim o soim aut dispela stua long Mosbi.

Sif Eksekutiv Opisa bilong Digicel PNG, John Mangos, i tok olsem dispela lonsim long Mosbi i makim stat bilong Digicel long progrem bilong en long opim ol wankain fleg stua bilong Digicel long PNG.

Mista Mangos i tok olsem bikpela as tingting bilong opim ol fleg stua bilong Digicel em long strongim Digicel bren o nem o stendet bilong ol olsem ol i gat ol wol klas prodak na sevis na dispela ol i redi long givim i go long ol kastoma bilong ol insait long PNG.

Em i tok dispela nupela stail i nsait long ol Digicel stua i soim ol naispela prodak ol i lainim na redim gut ol sampela ol kala long mekim ol kastoma i pilim amamas na laik tru long go raun insait long Digicel stua. Insait long stua tu i gat TV long soim ol prodak na sevis bilong Digicel long PNG.

Digicel em bikpela telekomyunikesen kampani long Karibien Ailan na tu long Pasifik na ol i save mekim wok bisnis long 32-pela bikpela maket long wol. I no long taim i go pinis Digicel i bin lonsim ol operesen bilong en long tripela kantri insait long Sentral Amerika.

Dispela kampani i save go pas long gutpela ol rit bilong en na ol toktok wailis o mobail fon sevis bilong en i gutpela tru.

Digicel long PNG i helpim long 0.7 pesen grup bilong Gros Domestik Prodak (GDP) bilong Papua Niugini long taim em i kamaut olsem namba tu mobail fon opereta long Julai 20, 2007.

3toea SMS with X'cess Fixed Wireless

3t SMS

Get Smart, get Connected with X'cess

- 6t per min local prepaid peak
- 3t per min local prepaid off peak

& now 3t per SMS

'Noken givim mani' – Tari Lot Meya

Timon Henry i raitim

LOT Meya bilong Tari Eben Atoriti, Ken Arawi i laikim Dipatmen bilong Treseri na Fainens i noken stretim wanpela giaman kleim inap long K4 milian bilong Tari Jeneral Haus Sik, bihain long em i bin painimaut olsem i nogat wanpela wok i kamap long hap.

Mista Arawi i mekim wok painimaut wantaim ol Dipatmen bilong Fainens na Treseri

Mista Arawi i mekim wok painim aut wantaim ol Dipatmen ov Fainens na Treseri na tok ol i noken peim ol dispela giaman kleim i kam long Tari Haus sik.

Dispela kleim i no tru bikos ol i no inap long toksave long mi long ol kain kain wok aninit long Ebenaisesen Ekt.

Em i tok Treseri na Fainens i mas givim ful ripot long wanem wok i kamap aninit long dispela kleim.

Em i tokim Wantok Niuspepa olsem ol dispela kain mani inap long kirapim ol kain kain Wok Developmen insait long Tari Taun na askim i go long ol Treseri Dipatmen long noken peim ol.



Call Customer Care for information on: 323 4444 / 344 4444



*SMS Service is available within the CDMA network only, and available to certain locations in PNG.

Namba wan daun-strim timba projek long Hailans rijen

...ol Pangia papagraun tok-pait long ai bilong ol minista

James Kila i raitim

OL LAIN papagraun bilong Is Pangia Forestri Menesmen Eria (FMA) long Sauten Hailans long Mande i bin mekim planti tokpait na kros long ai bilong ol gavman minista long opis bilong Nesenel Fores Atoriti (NFA) long Mosbi.

Dispela ol samting i bin kamap long taim NFA wantaim wanpela divelopa i sainim wanpela forestri agrimen.

Sampela papagraun i tok strong tru olsem ol laikim timba projek long kamap long eria bilong ol. Tasol sampela grup papagraun i no laikim.

Dispela ol tok-pait i mekim i go i go, na Minista bilong Pablik Sevis na MP bilong lalibu-Pangia, Peter O'Neill i kirap givim toktok long tokples Pangia stret long traime mekim ol papagraun ya i stap isi.

Dispela seremoni long Mande we i lukim PNG Fores Atoriti wantaim divelopa Madang Timbas em wanpela projek we i kisim longpela taim tru long kamap long dispela mak. Dispela projek i kisim samting olsem 15-yia inap long taim ol i sainim agrimen long Mande.

Dispela Is-Pangia FMA insait long Sauten Hailans provins em wanpela bikpela timba eria tru we mak bilong en i surik i go olsem Las Wiru long Pangia na i go long boda bilong Imbonngu na tu long hap i go olsem long Karimui.

Dispela timba projek em namba wan projek tru insait long Hailans rijen we bai lukim divelopa i katim ol diwai na yusim timba long fektori bilong em long katim i go daun na salim i go long ovasis maket. Dispela em ol i kolim daun-strim prosesing.

Menesing Dairekta bilong NFA, Kanawi Pouri i bin tok klia long ol lain papagraun husat i bin kamap long dispela taim long sainim bilong agrimen olsem ol wok redi bilong dispela projek i bin kisim longpela taim tru, klostu 15-pela yia olgeta.

Wanpela grup papagraun i no laik long ol i sainim agrimen. Ol dispela lain i tok olsem maski olsem ol i gat sampela graun insait long dispela projek eria, nem bilong ol i no stap insait long dispela FMA. Moa long en tu, sampela lain husat i bin go insait long kabon agrimen wantaim wanpela waitman bilong Australia i bin go insait tu long miting.

Planti ol toktok kros i go kam long ai stret long Fainens na Treseri Minista, Patrick Pruaitch, Fores Minista, Belden Nama, Pablik Sevis Minista, Peter O'Neill, Gavana bilong Sauten



AMAMAS: Mista O'Neill na Mista Nama wantaim Tresera Patrick Pruaits i apim glas wain long soim olsem agrimen i sain pinis. Foto: James Kila

Hailans, Anderson Agiru, Seketeri bilong Nesinol Plening, Joseph Lelang, provinsal edministreta bilong Sauten Hailans, William Powi na ol sinia wokman meri bilong NFA.

Wantok Niuspepa i bin stap long dispela miting long lukim ol bikman bilong PNG Fores Atoriti (PNGFA) wantaim divelopa em Madang Timbas i sainim agrimen.

Pastaim long ol i sainim agrimen, planti kain kain tok-pait i kamap taim sampela lain i no amamas olsem long agrimen. Ol i tok nem bilong ol i no stap insait long agrimen na ol i no laikim agrimen.

Wanpela papagraun Paul Wandi bilong Molo Inkoporetet len grup i i kros na tok hat tru long olsem em i no nidim ol lain 'kongkong ya na mani bilong ol'. Na dispela man wantaim ol sampela lain i wokabout i go autsait long miting na i no bin lukim sainim seremoni i kamap.

Ol narapela lain papagraun i tok olsem ol i laikim projek long kamap bikos ples bilong ol insait long Las Wiru i no gat ol gol, oil, ges na ol narapela samting long kisim mani. Ol i tok olsem ol i stap yet long bus na ol i laik sevis i mas go long ol. Na ol i amamas olsem dispela timba projek i gat ol wok plen i stap long wokim nupela rot, wokim skul na haus sik insait long Is Pangia eria.

Minista bilong Fores, Belden Nama, i tok dispela projek long Is Pangia em nambawan projek tru long Hailans rijen na namba tu insait long PNG we bai lukim kampani i go insait long daunstrim prosesing. Dispela i min olsem



SAINIM: Menesa bilong divelopa, Madang Timbas na bod memba bilong NFA



TOK KLIA: Paul Wandi bilong Molo Inkoporetet Len grup i no laikim agrimen na tok em i no nidim ol 'kongkong' na mani bilong ol.

kampani bai katim diwai na mekim i go liklik na salim i go long ovasis maket na tu long kantri long kisim mani.

Mista Nama i tokaut tu olsem em yet em wanpela papagraun bilong timba projek long ples bilong em na em i amamas kain divelopen i kamap long Is Pangia.

Em i toksave long ol papagraun olsem nupela lo bai i kamap we bai lukim ol papagraun i kisim gutpela mani mak long ol rauntimba o log. Ol papagraun bai i kisim samting olsem K35 long wan wan kubik mita diwai. Pastaim ol i save kisim tasol K10.

Gavana Agiru toktok

Gavana bilong Sauten Hailans wantaim Edministreta, William Powi, husat bilong Pangia distrik yet tu i bin stap long dispela seremoni long lukim ol i sainim agrimen.

Bikpela toktok Mista Agiru i toktok long dispela taim em olsem em i laik lukim olsem ol papagraun bilong Pangia long bihain taim i ken kamap olsem ol ekuiti patnas insait long dispela projek. Em ino laik lukim ol papagraun i kisim tasol royalti. Em i laik long lukim ol papagraun long bihain taim i ken i gat sea na tu kamap olsem papa bilong kampani.

Mista Agiru i givim tu strongpela toktok olsem planti ol bikpela diwai long bus long Hailans em i bilong bipo yet na i gat histori long en. Olsem na taim kampani i katim daun ol diwai em i mas planim ol nupela diwai gen.

Kabon Treid papagraun

Dispela eria long Is Pangia em long Sauten Hailans em bikpela eria we sampela lain papagraun tu i wok long traime bringim wanpela ovasis kampani long go insait long dispela kabon treid wok. Sampela ol lain husat i laik lukim kabon treid i kamap long dispela fores eria i bin go stap autsait long NFA ofis long Hohola na putim wanpela laplap na tok olsem ol i no laikim forestri wok long kamap. Ol i laikim kabon treid.

Minista bilong Fores, Mista Nama i givim bikpela toktok bipo long NFA wantaim divelopa, Madang Timbas i sainim agrimen olsem toktok bilong kabon treid em olsem 'Kago Kalt' toktok tasol ya. Ino gat wanpela lo o lejislesin i stap long kabon treid i kamap long PNG. Olsem na wanem ol papagraun husat i bihainim giaman tingting na mauswara bilong ol autsait lain i mas tingting pastaim na tu was gut long ol risoses bilong ol.

KRUSE I GAT BIKPELA LUK-SAVE: Long statim lotu long Sen Charles, Lwanga peris Gerehu insait long Besenel Kapitel Distrik, ol Alta bois i karim Krise na wok-about wantaim ol Alta na pater i go long ples bilong wokim lotu.



Basil tok strongim sapot bilong ol meri

SINGAUT i go long ol politisen, ples lida na ol arapela bikman long sapotim ol meri i go insait long ol wok bilong kamapim di-velopmen long ol yet na ol i ken kontribuit long ol wok di-velopmen long kantri.

Memba bilong Bulolo na sapota bilong ol meri i mas go fowet, Sam Basil, o tok olsem long welkam toktok bilong em las wiken bilong opim Ol Meri long Bisnis So lon g Lae, Morobe

provins long las wiken.

Mist Basil i tok ol meri em ol baksait bun bilong kantri tasol em i tok ol samting i karamapim ol man na meri em ol bikpela samting na long PNG, em i hat long senisim tingting bikos long pasin kastom, ol man em ol i bos.

Em i tok long ol meri PNG i brukim ol banis na go long ol nupela eria olsem politiks, bisnis, edukesen, na ol arapela wok olsem mekanik na kapenta,

pailot, enjinia, na draiva em i bikpela salens.

Olsem na em i singaut i go long ol politikel na komyuniti lida na ol narapela bikman long kam wantaim na helpim strongim ol meri long go long ol nupela eria.

Em i singaut i go tu long Komes na Indastri Minista, Gabriel Kapris long mekim moa wok long opim ol maket long ol ples na ol samting we ol i wokim em ol i ken kisim i go long ol

maket ovasis. Taim em i amamas long namba wan so i kamap bilong ol Meri long Bisnis, em i tok ol nesanel dipatmen bilong Agrikalsa, Edukesen na Tred na Indastri i mas wok bung wantaim long sapotim na helpim wok bilong lukautim na kamapim hani, wanpela eria we ol meri i ken go insait long em.

Em i autim wanpela tingting sapos Tred na Indastri i ken daunim ol takis long kisim ol samting

long yusim bilong mekim hani i kam long ovasis na moa yet, Nu Silan.

Na wankain tu long samting bilong somap na salim klos bikos dispela bai helpim ol meri.

Ol ripot i tok dispela namba wan so bilong ol Meri long Bisnis i bin ron gut wantaim planti ol meri i kam long ol narapela provins long PNG i soim ol samting we ol yet i wokim long em.

Mande em Intenesenel de bilong ol Meri

Mary MacKillop bai kamap namba wan santu bilong Australia

...Seremoni long mun Oktoba dispela yia

MANDE long neks wik, Mas 8, em i Intenesenel De bilong ol Meri bai ol meri i luksave long em long olgeta hap bilong wol.

Long dispela de, planti ol samting i save kamap long luksave long ol wok we ol meri i mekim long sait bilong ikonomi, politiks na sosel eria.

I save gat wanpela het tok bilong bihainim tasol long wankain taim tu, ol wan kantri i save gat het tok bilong ol long luksave long dispela de na karimaut ol program bilong ol.

Tasol het tok bilong dispela yia em, "Equal Rights, Equal Opportunities: Progress for All".

Long Tok Pisin, em i min olsem "Stap long wankain level, Wankain Sans: Ol wok bai go het long olgeta.

Wantok i no kisim tingting long sampela ol meri lida, tasol Meri Wantok i gat bilip olsem ol meri long PNG bai i gat ol program long luksave long dispela de.

AUSTRALIA bai i gat nambawan santu bilong em.

Sios long Australia i wok long selebret taim hetman bilong Katolik Sios long wol, Pop Benedict 16 i tokaut olsem Bleset Mary MacKillop bilong Australia i wanpela long ol 5-pela Katolik santu lain bai sios i givim luksave long ol olsem ol santu man na santu meri long dispela yia Oktoba 17 long Rom.

Kadinel George Pell, as-bisop bilong Sidni i tok olsem em i amamas long kisim dispela nius.

"Mary MacKillop i sanap long lewa bilong histri bilong Katolik Sios. Em i bin gat bikpela lewa long pogivim ol narapela i wokim rong long en na em i doim bikpela wok komitmen long ol wan kongrikesen Sister na tu, long sios li-



Mary MacKillop idai pinis, tasol bai kamap nambawan santu bilong Australia.

dasip we o no bin mekim gut long em long planti taim," Kadinel George i tok.

"Tasol Mary i bin wanpela meri tasol olsem ol narapela na em i gutpela piksa long ol manmeri bilong Australia. Mary MacKillop em i wanpela gutpela santu bilong Australia, na em em i bikpela samting bikos em i namba wan santu bilong kantri," Kadinel George i tok.

Praim Minista Kevin Rudd i tok amamas long nambawan santu bilong Australia olsem em i bikpela samting long sios na pipel bilong Australia.

Em (Praim Minista Rudd) i kolim em long "narapela kain meri long histri bilong Australia" we wok bilong em long edukesen na lukautim ol turangi

lain, i bin senisim rot long laip na wok bilong planti lain long Australia.

Mama i bin karim Mary MacKillop long Victoria long 1842 na em bin dai long 1909. Em i bin statim kongrikesen bilong ol Sister bilong Sen Joseph bilong Sekret Hat. Ol i bin statim ol skul na ol sariti ogenaissen long olgeta hap bilong Australia bilong lukautim ol lain we papamama i dai, ol pikinini we ol papamama i no bisi long ol na ol i raun nabaut i stap, ol lain i nogat haus bilong stap long en, ol sik na lapun. Long yia 1995, nau i dai Pop John Paula 2 i bin mekim Mary MacKillop i wanpela santu meri na tok em i soim gutpela piksa long ol pipel bilong Australia.

Bank Anytime, Anywhere. 24 hours a day, 7 days a week

SMS banking customers over
40,000 and growing!



Get out of the queue with
SMS Banking.
It's fast, simple and more
convenient.



Get started. Register today
at any BSP branch.

2 EZY!

www.bsp.com.pg

Ol sumatin i kisim salens

Veronica Hatutasi i raitim

OL SUMATIN long Allan Jones Memoriel Skul long Hula, Sentrel provins i kisim salens long wok hat na kisim gutpela lainim we na i helpim ol long sindaun na laip bilong ol.

Sentrel Provinsel Asisten Edukesen Sekreteri, Paul Hatagen, i bin tokim ol sumatin olsem as tingting bilong ol long go long skul em "long lainim ol samting bai helpim yupela long laip bilong yupela."

Em I bin tok tu olsem planti lain i kisim gutpela skul i stap nating bikos i nogat planti wok. Olsem na lainim ol i kisim nau i ken helpim ol long laip bilong ol, tasol samting i stap long han bilong ol long yusim save.

"I nogat planti wok long dispela taim na em i hat long painim wok. Yupela i lukim planti ol manmeri i kisim bikpela save i stap nating tude. Tasol save yupela i kisim nau bai helpim yupela long sindaun na laip bilong yupela long ples na ol hap bai yupela i stap long en bihain long yupela i pinisim skul," Mista Hatagen i bin tokim ol sumatin.

Em i bin tokim tu ol sumatin olsem ol i mas save long wanem samting ol i laik mekim na ol i skul, bikos sapos i nogat, bai skul i nogat mining.

Em bin tok bikpela mani tumas long peim skul fi bilong ol sumatin na ol i mas luksave long hat wok bilong ol papamama na tu, ol yet i wok hat long mekim gut long skul.

Bihainim ol toktok we planti ol eks sumatin bilong Mista Jones i mekim olsem em i strongpela man bilong laikim "discipline" o stretpela pasin, Mista Hatagen i bin tok "discipline" bikpela toktok tasol em i min olsem "putim gutpela klos, kam long taim stret long skul na noken kam leit na lainim ol samting we Mista Jones i bin gat na i givim long ol eks sumatin na i mas stap long skul.

"Mi bilip olsem yupela i lainim long Mista Jones na ol eks sumatin bilong em. Em i bin wanpela gutpela skul edministreta husat i bin gat strongpela na stretpela pasin," Mista Hatagen i bin tok.

Em i bin wokim ol dispela toktok long dedikesen seremoni bilong Allan Jones, wanpela man Adelaide long Saut Australia tasol em i bin wok olsem tisa long PNG long 42 yia, stat yet long yia 1964. Na Manea Manea Praimeri skul long Hula Viles em i wanpela long ol skul em i bin tisa long en. Na ol pipel i laikim em tumas na olsem, dispela seremoni i bin lukim skul i senisim nem i go long Allan Jones Memoriel skul. Tu, tupela kandere meri bilong Mista Jones i bin karim ol bun es (sit bilong paia) bilong em long planim long skul na ples em bin laikim tumas.

Ol narapela ples long PNG we Mista Jones i bin tisa long ol em, Daumagini long Sentrel provins, Karkar hai skul long Madang Provins, Popondeta long Oro Provins na Cameron Sekonderi long Milen Be Provins.

Mista Hatagen i bin luksave long bikpela na gutpela wok bilong Allan Jones. Na em yet i bin go pas long wokim dedikesen long senisim nem bilong skul i go long Allan Jones Memoriel skul we stat yet long las Fonde, ol bai kolim long nupela nem nau.

Skul i senisim nem long 4-pela taim nau, tasol pipel i bilip olsem dispela nupela nem, Allan Jones Memoriel skul bai i stap. Ol pastaim skul nem em, Manea Manea, Piki Ravusiro, Manea Manea Praimeri tasol nau, Allan Jones Memoriel skul bai i stap.

Rigo Distrik Etministreta i bin salensim ol tisa long bihainim strongpela stretpela pasin we Mista Jones i bin gat long en.

"Mi salensim yupela olgeta



NEM SENIS: Mista Hatagen i rausim karamap bilong memoriel ston bilong Allan Jones bai i sanap nau long skul.



SUMATIN MAS: Ol sumatin i mas i go long seremoni eria. Potos: Veronica Hatutasi

tisa insait long Sentrel provins olsem yumi I ken mekim, Mista Jones i bin givim ol sumatin bilong em raitpela save na ol gutpela stretpela pasin we i helpim

ol gut long wok na laip bilong ol. Mista Jones em i wanpela bikman i soim rot yumi long provins i mas bihainim. Sapos yupela i no mekim, husat bai mekim.

Samting i stap long han bilong yumi long bihainim wokabout bilong Mista Jones na yumi i mas mekim nau," Distrik Edministreta i tok.

Raun lukim ol meri na pikinini



MIDIA WOKSOP LONG SIK TB: Nau na Yumi FM Ripota, Rachael Rasehei i kisim setifiket long World Visin pablik rilesens opisa, Sian White bihain long wanpela de woksop ol nius ripota bilong ol wanwan media ogenaesen long Mosbi. World Visin em wanpela Krsiten intanesenel ogenaesen i bin ranim long dispela wik Tunde long Lamana Hotel. Samting olsem 15-pela ripota wantaim tu sampela yunivesiti sumatin i skul long kamap ol nius manmeri i bin sindaun long woksop long kisim moa save long ripot long sik TB. *Poto: Veronica Hatutasi.*



BUNG BILONG TOKTOK LONG PIKININI LO: (L-R) Ol bik manmeri bilong Komyuniti Dvelopmen-Dairekta bilong Child Welfare, Isabel Salatiel, Sekreteri Joseph Klapat na Minista Dame Carol Kidu long wanpela Midia bung we ol i toktok long "Lukautim Pikinini Ekt" o lo long dispela wik Tunde. *Poto: Veronica Hatutasi.*

Ol PNG pikinini i gat nupela lukaut lo



LUKAUTIM PIKININI: Komyuniti Dvelopmen Minista Dame Carol Kidu, Sekreteri Joseph Klapat na ol bik manmeri bilong dipatmen na ol patna i wok hat long kamapim lo i sanap long wanpela posta i gat ol toktok long ol samting we nupela lo i karamapim. *Poto: Veronica Hatutasi*

Veronica Hatutasi

OL pikinini bilong PNG i gat lo bilong lukautim ol raiti na stiaim gutpela sindaun na laip bilong ol.

Kabinet i bin tok oraitim "Lukautim Pikinini Ekt" (LPA) o lo na gesetim long kamap lo tripela wik i go pinis, long Janueri 26.

Komyuniti Dvelopmen Dipatmen na ol patna bai lonsim nupela lo long tupela wik i kam, Mas 12 long Institut bilong Pablik Etministresen long Mosbi.

Insait long wanpela bung wantaim ol nius ripota na ol narapela patna bilong Komyuniti Dvelopmen Dipatmen long dispela wik Tunde, (Komyuniti Dvelopmen) Minista, Dame Carol Kidu i tok bikpela hatwok tru i bin go long kamapim dispela Lukautim Pikinini Lo we bai i kisim ples bilong olupela lo ol i wokim long 1961.

"I bin wanpela longpela na hatpela rot long kamapim dispela lo. Em i kisim 15 yia long

kamapim dispela lo long kisim ples bilong olupela lo ol i bin wokim 50 yia i go pinis long 1961.

"LPA i karamapim 9-pela Rait bilong ol pikinini bai i stap olsem lukaut na stia long gutpela bilong ol pikinini. Em long rait bilong pikinini, rait bilong pikinini long stap wantaim papamama, wok long lukautim pikinini, wok bilong papamama, ol pasin kastom i sut long ol pikinini i no gutpela, givim wok long ol pikinini i no gutpela na ol disebel pikinini," Dame Carol i tok.

Tasol em i tok tu olsem antap long ol dispela rait na ol dispela i stap insait long Lukautim Pikinini Lo, ol i putim tu sampela ol gutpela rait we yumi yet long PNG na Melanesia i gat long em long ol pikinini.

Dame Carol i tok LPA i singautim ol kea senta we ol i save lukautim oil pikinini (Early Childhood Care Centres) long rijista wantaim Lukautim Pikinini Kaunsel (LPC) we bai givim ol laisens long karimaut wok bi-

long ol. Em i tok tu olsem LPC i gat pawa long rausim laisens bilong ol senta sapos ol i no bihainim ol samting kaunsel i kamapim bilong ol.

Sekreteri Klapat i tok tru, em i bin kisim longpela taim long kamapim lo bilong lukautim ol pikinini tasol em i gutpela bikos ol i glasim ol kain senis i kamap long wol na kantri na mekim kamap lo.

"Mipela i glasim ekt o lo bihainim ol kain senis i kamap long olgeta hap bilong grauntude. Senis long welfea bilong ol pikinini, pipel i lusim ples na i go long taun, HIV AIDS na ol arapela moa. Planti salens em mipela i bungim tasol wantaim ol patna bilong mipela na moa yet, UNICEF, mipela i nau i kamap wantaim lo bihain long 20 yia.

"Yumi mas lukautim ol pikinini bikos em ol risos bilong yumi long bihain taim bilong yumi," Mista Klapat i tok.

Em i tok long neks yia, bai ol i karimaut ol lukautim pikinini program.

Dairekta bilong "Child Welfea" o welfea bilong ol pikinini, Isabel Salatiel i tok program em ol bai go hetim long ol provins, ol distrik na ol Lokol Level Gavman Kaunsel eria.

Tasol em i tok wanpela hevi long karimaut ol program em long sot long ol woklain. Tasol em i bilip olsem bai gat ol nupela lain bai wok wantaim ol long mekim dispela wok.

Taim em i amamas long nupela lukautim pikinini lo i kamap, em i tok "taim i senis na yumi i mas wokim samting long lukaitim ol pikinini bilong yumi."

Em i tok i moabeta nau long ol woklain bilong gavman long redi gut long wok bung wantaim long go hetim ol program na wok bilong lukautim ol pikinini lo.

Lukautim Pikinini Ekt i karamapim ol pikinini we mama i karim tasol inap long ol dispela i gat 18 krismas.

Sapotim ol yut long Wewak daiosis

OL SIOS long kantri i strongim ol wok long helpim ol yut long spiritual, sosel, sait bilong tingting na tu long strongim bodi bilong ol.

Olsem na ol i kamapim ol program long ol yut i go insait long ol na ol i ken kamap ol gutpela manmeri long ol famili, skul, komyuniti na kantri.

Long namba Febueri 8 inap long de namba 12, ol Katolik Yut Lida bilong tripela dineri bilong Wewak Daoisis i bin stap insait long 'Servant Leadership Retreat' long Kunjingini Parish long Maprik Dineri.

Dispela ritrit i bungim 71 yangpela manmeri, 6-pela i kam long wara Sepik, 36 long Wewak

Dineri na 29 long Maprik dineri.

Pater Geovanne Bustos, SVD, Peris Pris bilong Kunjingini, i go pas long givim dispela ritrit. Dispela ritrit i bin sut long as tingting long singaut bilong God long kamap disaipel olsem Jisas i gutpela wasman na em i kam long givim laip i pulap tru olsem Jisas i tok long John 10, 10.

Narapela hap bilong gutnius long Mk10,43-44 Jisas i toktok long man i laik kamap lida i mas daunim em yet na givim sevis long ol pipel. Dispela ritrit i helpim ol momoa yet long skelim na luksave long pasin bilong ol olsem lida nogut na gutpela lida na bai ol i ken luksave long wanem wok

lida ol i mas mekim insait long yut ministri.

Sampela yut i autim tinting bilong ol.

Jacob Junior bilong Kunjingini, em i wanpela yut lida i tok olsem dispela ritrit i helpim em long luksave long wok bilong em olsem lida na wanem wokstia em i mas mekim.

Lesly Kuhori bilong Turinghi i tok olsem dispela ritrit em i helpim em tru taim em i go long meditesen na em i pilim pawa na strong bilong God.

Christa Korein, Yut lida bilong Boiken, i bin tok olsem dispela ritrit i bin helpim em long rot bilong harim God i toktok long pasin bi-

long stap isi na putim yau long ol samting i stap raun olsem nature God i wokim.

Narapela yanpela meri Elisabeth Jerry bilong Shalom Parish i bin tok olsem ritrit i bin helpim em long taim bilong meditesen long pilim olsem God i stap tru tru insait long em. "Nau mi pilim wanpela bikpela amamas, mi no bin pilim bipo" em i yet i tok.

Wantaim dispela samting James Staku, Yuth Coordinator bilong Daisis i bin tok tenkyu long Pater Geovanne husat i go pas long givim ritrit na Kunjingini Parish yut husat i bin redim ples olsem na dispela ritrit i kamap gutpela tru.



WANTOK KOMENTRI

Moti ripot kam bek gen ...tru tru o mauswara?

GUTPELA long taim poroman bilong yumi PNG i kamap gen, tasol mipela i wok lukluk tasol. Bai mipela i kisim gut stori bilong en o nogat.

Dispela wik, dispela nem 'Moti' i wok pas long maus bilong ol lida bilong yumi gen.

Na sapos Praisin Minista Somare i tok tru, dispela ripot bilong Moti Inkwairi bai kamap ples klia bai yumi olgeta i ken save long wanem samting tru i bin kamap.

Bikpela toktok i kamaut long haus tambaran bilong yumi PNG em olsem ol ripot bilong Moti Inkwairi, na narapela bikpela, Fainens Inkwairi, bai go long han bilong Palamen.

Na taim em i kamap long floa bilong Palamen, pipel i laik bihainim askim bilong Oposisen na save, bai Praisin Minista i tokaut stret long ol samting dispela ol inkwairi i bin painimaut o nogat?

Pasin bilong PNG politiks, em i no nupela long yumi.

Sapos i gat wanpela bikpela hevi i kamap we i bin sek-sekim kantri, na olgeta manmeri i bin toktok planti long en, i no long taim bihain, bai ol giaman mauswara na tok pisin bilong ol bikmanmeri bai suvim dispela ol tingting i go long baksait tru long het bilong yumi, na bai yumi lusim tingting wan tu tasol.

Tasol sapos yu no save long pasin bilong PNG politiks, bai yu mas lainim gut.

Wok bilong gavman em i save sanap long tupela samting, namba wan, em ol gutpela samting we gavman i mekim we bai em i strongim kantri na pipel. Namba tu, em ol paul pasin bilong gavman, we ol lida i mekim, na pipel i no save.

Dispela tupela tingting em i as tru long wok gavman long PNG. Wok tru tru, we ol bikmanmeri, ol 'hait' bikmanmeri na ol pablik seven i save mekim, em long skelim we bilong yusim dispela tupela samting long kilim tingting bilong pipel. Sapos i gutpela samting o wok, bai yu lukim ol i tok-tok planti, mekim planti nois, na olsem.

Sapos i no krangi liklik, bai yu lukim bikpela toktok i kamap, evidens bai go sindaun wantaim ol kokoros na musmus, na wanpela arapela bikpela samting o hevi em ol bai autim long giaman pulim na paulim tingting bilong ol manmeri.

Yumi PNG i olsem. Tingting bilong yumi i save sot klostu klostu, bihainim ol nupela hevi i kamap.

Olsem na taim yumi skin kirap long harim wanem samting i stap insait long ol ripot bilong Moti na Fainens, yumi noken lusim tingting tu long ol arapela bikpela samting i kamap dispela wik, olsem nius bilong biknem raskol man William Kapris i tokaut long nem bilong ol lida i helpim em long raskol pasin bilong em.

Polis mas pinisim stret operesen bilong ol

Gutpela long harim olsem ol polisman bin mekim gutpela wok tru long holim bek ol dispela biknem raskol lain husat bin ronawe long haus kalabus long Boman long Mosbi long las yia.

Em soim klia olsem ol polis bin sanap stret na sut stret long karimaut dispela wok inap ol pinisim gut. Ating dipatmen bilong polis bin larim ol dispela polis long mekim dispela wok na i no arapela wok nabaut we inap paulim long ol holim ol bek long pinisim gut wok bilong ol.

Dispela em wanpela gutpela piksa na mak bilong mekim wok na pinisim gut wanpela hevi o operesen mas kamap gut na pinisim gut.

Moabeta ol polis fos bilong yumi mas mekim kain olsem long ol arapela bikpela hevi bilong lo na oda we i stap long kantri bilong yumi. Yumi gat planti kainkain hevi bilong lo na oda i stap tasol ol



polis no save pinisim gut na hevi save hangamap yet.

Moabeta dispel piksa nau yumi long ol polisman i mas soim sampela kain luksave bilong wei bilong mekim wok na pinisim gut.

Ol bosman bilong polis fos noken kam insait na putim arapela wok moa antap long ol o senisim ol go kam long wok bilong ol inap ol pinisim gut dispela operesen bilong ol gut pastaim.

Gutpela tu long harim olsem ol arapela kalabus lain husat bin ronawe long ol arapela haus kalabus long arapela provins tu em ol polisman wok long mekim gutpela wok long holim ol bek. Sampela em ol pipel yet long komyuniti tu ol sapotim polis na holim ol o givim toksave long polis long kam na

holim ol. Em gutpela sain bilong polis na komyuniti i wok bung wantaim.

Tingim, hevi bilong lo na oda em hevi bilong yumi olgeta long helpim helpim na stretim. I no wok bilong ol polisman na ol lain go pas long lukautim lo na oda tasol.

Sori stori yumi ritim na harim long dispel wok long wanpela polimeri bin lusim laip bilong em long Hagen long han bilong raskol man ol bin holim na laik karim go long rum gad. Man ya i holim bom wantaim em na bom i bruk na kilim dispel a polimeri wantaim em yet. Tupela arapela polisman i kisim bagarap na stap long haus sik.

Tasol bikpela sori tru go long dispela polimeri bikos em mekim wok bilong em stret long karimaut wok bilong lo na oda na em lusim laip bilong em long dispel taim.

Ating sapos ol bin sekim dispela man ya pastaim, ol inap long rausim dispela

bom long han bilong em pastaim long em kalap wantaim ol long kar na go long polis stesin.

Sampela taim ol polisman save bisi tru long wok bilong ol na sampela kain samting olsem ol no inap tingim o ol hariap long karim man ya go longwe long hap we em bai nogat sapot long en. Husat save olsem man nogut ya karim bom. Sori stret long dispela birua i kamap na bikpela tok sori go long ol lain famili na pikinini bilong dispela polimeri.

Turangu em dai long wok bilong em long sevim yumi ol manmeri long kain pasin nogut na birua bilong raskol we i save bagarapim gutpela sindaun na wokabout bilong yumi. Dai bilong susa ya inap givim strong long ol polisfos bilong yumi long sanap strong na go het yet long rausim ol kain raskol na trabel lain long komyuniti bilong yumi long mekim komyuniti bilong yumi i stap gutpela.

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

Published at
Section 58, Allotment 3
Office 2, Waigani Drive

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



LAE TOK-AUT (DEKLERESIN)

Dispela tokaut i kam long Papua Niugini Provinsal Edministretas i go long Operesin na Wok-kamap bilong Papua Niugini Visin 2015 long Provinsal Level insait long Operesin na Gutpela Wok bung long kamap wantaim dispela Visin.

WOK-MAK IGO PAS

1. Wanpela konfrens long lukluk igo insait long wok na wanem samting long kamapim wok insait long Papua Niugini Visin 2050 long Provinsal Level insait long gutpela wok bung na plenim wantaim ol lukluk i go pas bilong Visin, ol gol, as-tingting na wanem mak long kamap long en i bin kamap long Lae siti stat long Februari 24 igo 26, 2010.

2. Ol Provinsal Edministretas insait long Papua Niugini i bin kamap long dispela konfrens. Gavana bilong Morobe Provins, Hon. Luther Wenge i bin opim dispela konfrens. Na bikpela toktok em Ekting Sif Seketeri i go long Gavman, Mista Manasupe Zurenuoc i bin givim.

3. Long taim Gavana Luther Wenge i bin tokaut long konfrens i op, em i tok olsem em i gat bilip long wanem kain tingting na save ol Provinsal Edministretas wantaim ol edvaisas bilong ol long painim ol gutpela rot long karimaut gut ol wok bioong PNG Visin 2050. Em i salensim tu konfrens long lukluk na senisim sampela lo we ino gat mining na ino go gut wantaim laip bilong ol manmeri insait long Papua Niugini. Em laik olsem ol i mas promotim Visin long olgeta kona bilong kantri, na tu serim gut wanem samting kantri i gat na promotim veliu long ol expot o wanem ol i salim igo ovasis.

4. Long bikpela toktok bilong ekting Sif Seketeri igo long Gavman, Mista Zurenuoc i singaut i go long ol Edministreta long strongim save bilong ol na bungim gut ol infomesin long Papua Niugini Visin 2050. Dispela i ken mekim ol i wok bung wantaim na go wantaim ol gol na as-tingting bilong Visin 20150 taim ol i redim ol Provinsal plen na baset o mani plen bilong ol. Em i tok strong tu long posisen bilong Gavman olsem wanem ol risos ol i givim long bihain taim na menesmen bai i bihainim wanem ol gutpela wok na kodinesin wantaim nambawan mak bilong Visin Dipatmen bilong Praim Minista na NEC we em i stap long en.

5. Ekting Seketeri igo long Dipatmen bilong Praim Minista na NEC, Ms Margaret Elias i givim ripot long wanem ol kain ol wok i ken kamap na wanem samting long mekim we i bihainim Visin

2050 long taim Praim Minista i bin launsim o putim kamaut olsem presen igo longol pipel bilong Papua Niugini. Dispela i bin kamap long wanpela naispela pablik seremoni long Sir John Guise Stedium long 18 Novemba 2009.

6. Ms Elias i bin givim toktok long wok em Dipatmen i bin kamapim taim Praim Minista i tokim ol long mekim long 7 Disemba 2009. Dispela i bihainim wanpela pepa igo au taim Ekting Sif Seketeri igo long Gavman, Mista Manasupe Zurenuoc i givim long 14 Disemba 2009.

7. Moa long en, Ms Elias i toktok moa long ol senis we i bai kamap insait long Dipatmen long lukautim wanem ol wok bai i kamap long en long sait bilong lukautim PNG Visin 2050. Dispela i kamap bihain long Ekting Sif Seketeri i go long Gavman, Manasupe Zurenuoc mekim komisining i go long wok bilong Visin long ol het-man bilong ol pablik ejensi long Waigani long 22 Disemba 2009.

8. Ms Elias i pinisim tok olosem Praim Minista igo pas long olgeta wok operesin na wok kamap long Papua Niugini aninit long Dipatmen bilong em na i save kisim ol ripot olgeta taim long wanem samting i kamap. Na Praim Minista i laik lukim olsem olgeta Gavman ejensi na tu ol Provinsal Edministresin i mas stretim gut ol yet na redim ol wok-plen bilong ol na baset (moniplen) bilong ol long bo wantaim ol wok-mak (stratejik visin) bilong nesinol developmen em PNG Visin 2050 we olgeta narapela sot-taim, medium o long-taim plen i mas bihainim o go wantaim.

9. Profesa David Kavanamur, husat em Siaman bilong NSPTF we i go pas long kamapim PNG Visin 2050 i givim ol toktok we i karamapim Visin, na i tokaut long rot igo fowat long karimaut ol wok insait long Visin. Em i toktok long ol 6-pela pila o pos bilong Visin na i askim ol Provins long developim ol Provinsal Developmen Stratejis yusim Visin 2050 na ol sektoral developmen stratejis (plen) we i pas wantaim dispela wan wan bikpela wok-mak we i stap long lukaut bilong Sif Seketeri na NEC Trensisonal Ovasait Bodi (TOB). Em i tok olsem long wan wan ol dispela bikpela wok-mak ol Provins imas redim gut ol bikpela wok-plen bilong ol na wanem ol as-tingting long mekim wok na tu soim ol eria we wok bai kamap long en na tu hamas mani long yusim. Dispela i mas kamap long taim stret long mun Jun baset taim long 2010.

10. Profesa Kavanamur i tok olsem long nambawan ol wok bilong ol Provinsal HDI Index, em ol wok i mas stap long 4-pela HDI eria insait long 5-pela yia. Ol dispela HDI em Edukesin, Helt, Strongim ol Pipel na Gro long Ekonomi. Ol Provins mas lukim olsem ol Sevis igo long ol Sekta i mas kisim sapot.

11. Profesa Kavanamur i tok strong olsem bikpela samting na nid long i gat ol Provinsal Plen na stretim ol long go wantaim wanem ol gutpela nid na risoses ol i gat. He i toksave gen long konfrens olsem ino gat plen i gutpela tru. Tasol bikpela samting i stap long kaikai bilong en na wanem salens bai kamap long taim bilong karimaut ol wok plen na dispela i stap insait long Nesinol Baset taim long mun Jun taim kilok i stat long ron, taim em i soim olsem 39-yia taim bilong Visin long go yet. Em i askim long moa gutpela wok i mas kamap long olgeta level bilong Gavman, bikos long kain ol wok ol Provinsal Edministresin i mas mekim long ol programs bilong ol aninit long Visin.

12. Dokta Alphonse Gelu long taim em i toktok long Minimum Praioriti Wok na Wanem Wok long Kamapim i lukluk long pasin bilong wok bung wantaim na wok namel long ol nesinol ejensi - PLLSMA. Em i toksave gen olsem Visin i kam long Gavman na Gavman i redi long karimaut wok bilong Visin. I gat politikol strong i stap long dispela Visin. Em i tok tuolsem wane mol wok long nesinol levul em ol nesinol ejensi i mas papa long en pastaim long em igo daun long ol sab-nesinol levul na ol wok-plen long karimaut wok i stat pinis na ol i mas yusim nau.

13. Mista Daniel Kapi, husat em deputim Siaman bilong NSP Taskfos, long taim em i tok-klia long tri-taia gavman sistem i tokaut long ol salens Visin 2050 i gat, olsem na ol sistem bilong Gavman i mas strongim ol pipel bilong Papua Niugini long stap "SMAT, i GAT GUTPELA TINGTING, FEA, HELTI NA AMAS INAP LONG 2050" na long kisim moa toksave long ol tingting long provinsal gavman rifoms na na long sait bilong autonomi.

14. Em i askim kwesten long wanem ol samting i ken stopim ol sevises long provinsal na lokal level na wanem gutpela wok sistem bilong gavman i ken bringim. Bikpela samting em long wanem tru, sampela provins i wok long askim strong long autonomi, na sapos bikpela pawa i ken go long ol long bringim ap ol sevises, o i gat rot long givim igo ol pawa na wanem ol lo i stap long dispela.



Mista Luther Wenge, Gavana bilong Morobe i opim konfrens



Mis Margaret Elias, Mista Manasupe Zurenuoc and Gavana Luther Wenge long taim bilong opening bilong konfrens.



Mis Margaret Elias i adresim konfrens



Profesa David Kavanamur



Dokta Alphonse Gelu



Mista Daniel Kapi

15. Seketeri bilong Dipatmen ov Provinsal na Lokal Gavman Afes, Mista Manasupe Zurenuoc i bin givim toktok long wok bilong developmen bilong wanpela polisi long autonomi. Em i tok olsem wanpela Spesol Autonomi Komiti i kamap pinis long lukluk bihain long Morobe Komunikei (Pasim Tok). Em i tok olsem bai i gat planti taim long ol wan wan lain long toktok wantaim pastaim bipo long NEC i tok-orait na givim aut. Em i tok tu olsem DPLGA i statim wok pinis long karimaut ol politikal wok lukluk we i stap insait long Visin 2050.

16. Mista Noel Mobiha, Spesol Edvaisa i go long Praim Minista long Satelait Projek i tokim konfrens olsem komunikesin infrastraksa em bikpela samting nau insait long wol long tude. Em i luksave olsem Praim Minista i laikim olsem PNG i mas i gat komunikesin satelait sistem. Dispela em wanpela bikpela long-taim projek na ol sampela bikpela projek i wok long develop we igo wantaim 7-pela bikpela mak bilong PNG Visin 2050. Em i singaut igo long ol Provinsal Edministretas long lukluk igo insait long mid bilong ICT olsem wanpela bikpela samting long helpim PNG Visin 2050 na em i salensim ol Edministretas long senisim ol fowat plen bilong ol long holim-pasim ICT olsem samting bilong karimaut wok gut tru na strongim wok bilong ol na tu bringim kamap bikpela ol operesin bilong ol.

17. Mista Clant Alok, husat em Teknikol Edvaisa long Sevis Deliveri na Mekanism aninit long pila namba-3 bilong PNG Visin 2050 i tok kliia olsem as-tinting bilong Intagreted Deliveri Mekanism ol i plen long kamapim em long strongim ol pipel long PNG, long sait bilong wok na lukautim ol yet (selp-rilaiens) na lukautim gut moni bilong ol na mekim wok. Ol strateji o wok-plen em long kisim ol distrik long kamap olsem ol ples long kisim sevis na senta long gro na long lukim olsem IDSD em bak-sait bun long sevis igo long olgeta pila o wok-mak. Em i toktok moa long bikpela wok bilong Polisi na Plening i wok bung wantaim tasol polisi i mas draivim ol plen. Em i tok olsem Plening save kamap stat long ol wod na LLG na i save kisim sapot long ol polisi i kam long provinsal na nesinol level. Bikpela samting em long kamapim Integreted Provinsal Developmen Plen (IPDP) long ol provins na putim mani long en long promotim ruel wok long strongim gavman na

lukim olsem ol wok i ken kamap long wod level.

18. Wanem ol toktok i kam long ol Provinsal Edministretas em karamapim dispela ol tok i stap hia:

- Wok i mas kamap long karimaut toksave o aweanes long plen (strateji long kamap)
- Nesinol ejensi i mas redim ol plen long go wantaim Visin;
- Husat bai karimaut wok long ol provins i gat planti risoses long mekim na ol i ken save long Visin;
- I gat nid o wok i mas kamap long redim gut na karimaut gut ol wok bilong nesinol dipatmen insait



Ekting Seketeri bilong Dipatmen bilong Praim Minista na NEC, Mis Margaret Elias, Ekting Sif Seketeri Mista Manasupe Zurenuoc na Gavana bilong Morobe Luther Wenge long konfrens. Sanap baksait em Morobe Administreta, Mista Kemasang Tomala

long Visin;

- Ol wok tru o praktikal wok i mas kamap long karimaut wok bilong Visin igo insait long ol risoses, wok na wanem samting ol nesinol ejensi bai mekim wantaim ol provins;
- Wok bilong CACC long muvim Olgeta Gavman karimaut ol wok bilong Visin;
- I mas gat Lidasip long nesinol level long gohet gut oltaim long wanem toktok ol i mekim na bung toktok namel long ol provins;
- I mas gat nid long givim igo daun pawa i kam long DPM long HR pawa we i go wantaim hamas mani ol i givim i go long ol provins;

■ Sapot igo long Visin em ino wanpela hevi na nogat hevi i stap long sait bilong karimaut wok em nesinol ejensi ino kam long ol pati;

■ Wanem bel-hevi namel long ol nesinol ejensi em ol mas stretim pastaim na olgeta i mas singsing long wanpela song tasol;

■ Olgeta nesinol ejensi mas mekim wok bilong ol. Piksa em DoT i mas tokaut long hamas mani ol nidim long mekim wok na Dipatmen of Nesinol Plening na Monitoring i mas tokaut long developmen mani;

■ I mas gat nid long namba tu dokumen o pepa-wok we i soim aut ples kliia ol wok na wanem

stetmen bilong Gavman.

■ NEC Disisen 196/2009 (i tok-orait long PAPUA NIUGINI VISIN 2050 OLSEM EM TASOL em plen we olgeta narapela plen na visin olsem sot-taim, medium-tem Strateji na Koporet Plen i mas bihain na go wantaim);

■ Morobe Komunikei (tri-taia gavman, SDMM na Strongim Gavman)

Praim Minista i go pas long lukautim PNG Visin 2050;

Daireksinol Stetmen bilong Praim Minista; Dairektiv o toktok bilong Praim Minista i go long Sif Seketeri igo long Gavman;

Toktok bilong Sif Seketeri i go long olgeta het bilong olgeta publik sekta ejensi;

■ Toktok bilong Praim Minista insait long sekula i go long olgeta Minista;

Ol Dairektiv o toktok bilong Praim Minista i go long Deputi Praim Minista;

■ Ol Dairektiv o toktok bilong Praim Minista i go long Inta-Gavman Rilesins Minista;

■ Kamap bilong Transisinol Komiti insait long Dipatmen bilong PM na NEC;

Kamap bilong Visin Ovasait Bodi;

■ Nid long PM dairektiv i go stret long Minista bilong Nesinol Plening;

Karimaut wok long Rait Sais Ripot;

C. REKOMENDESIN

21. Mipela askim olsem dispela ol samting i mas kamap long go wantaim Visin 2050.

Putim long oda Nesenel Level

22. Sif Seketeri na Seketeri bilong Dipatmen of PM na NEC bai helpim long dispela wok:

■ Senisim trisinel tim i go long PNG Visen Senta o ejensi;

■ Kamapim toktok namel wantaim ol bikpela ejensi, developmen patna na ol arapela stekholda;

■ Putim long oda ol polisi (olsem senis I kamap long PM na NEC Ekt);

■ Putim long oda Edmin na sistem (olsem Fansinel assainmen o wok na ditaminesen na ISDMM long ol provins);



Mista Gorgom na Joseph Kunda i sindaun long konfrens



Mista Bill Kua i harim wanpela spika i givim tok



Profesa David Kavanamur na Dokta Angelica Braun



Mista Noel Mobiha



Mista Clant Alok



Hon. Bob Dadae, Minista bilong Difens i stap tu olsem wan-pela 'obseva'

Putim long oda ol toktok bilong otoriti (olsem givim pawa o strongim PA- Provinsal Edministretas long menesim Visen 2050);

Risos plening na putim long oda ol toktok bilong mensmen (olsem putim long oda developmen baset long PNG Visen 2050, pinisim developmen bilong 7-pela pila, Visen implementesin plen) na

Putim long oda ol toktok na wok bilong lidasip (onasip) long olgeta level.

Putim long oda Provinsal Level

23. Kain samting bai kamap long putim long oda Visen 2050 long provinsal level:

Tokaut long Visen 2050 plen long Provinsal Eksekutyutiv Kaunsil wantaim ol ejensi we wok bilong ol pas wantaim Visen;

Developim Stratejik Dikleresen olsem Malangan Dikleresin long provinsal level;

Mekim Rodso long Visen 2050 plen long ol provins na distrik;

Kamapim ISDMM tingting;

Kamapim polisi plening bilong IPDP;

Kamapim PCMC;

Pablik sevis senis I kamap bilong ol developmen bilong ol distrik we bai lukluk long 7-pela liklik eria bilong wok;

Gutpela bilong 7-pela pila

Populesen menesmen;

Len mobilaisesen/rifom/menesmen;

Sektorol esensi bilong ol Pila alainmen (pila 4);

Diosentrelaisesen bilong ol maigresen, leba na IPA wok;

Lukluk long ol konsep pepa bilong komyuniti developmen we bai kamap long pila 6;

Integriti bilong ol nesanel ileksen (pila 3);

Rot I go fowet

Nesanel Gavman

Mekim kamap na ronim gut ol alainmen

na bung wantaim ol ki sentrol ejensi; Kamapim gut developmen bilong olgeta 7-pela pila;

Developim PNG Vision 2050 implementesin plen;

Ol sistem na proses odit na alainmen;

Ol wok redi na aweanes program;

Ripot I go long ol nesanel otoriti;

Trening (HR developmen, PSWDP);

Redim ol baset;

Ol Provins

Ripot I go long ol provinsal otoriti;



Wanpela grup i sindaun na paitim toktok

Ol wok redi na aweanes program;

Wok redi bilong baset;

Ol sistem nap roses odit na alainmen

D. DIKLERESEN BILONG WANWAN WOK

24. Hia em sampela ol wok we i mas kamap inwsait long narapela 12-pela mun i kam.

Long soim sapot long ol wok bilong bungim astingting bilong PNG 2050, mipela ol provinsal edministreta i bung long Lae long Febuari 24-26, 2010 long makim olgeta

provinsal edministreta bilong PNG na i pasim tok olsem:

1. Prais minista bai go pas long olgeta wok bilong developmen baset na pesanel menesmen pawa na bai givim wok long sif sekreteri bilong gavman na sekreteri bilong gavman na sekreteri bilong PM&NEC long kamapim gut olgeta wok bilong PNG Vision 2050;

2. Ol provins we i nogat PCMC i mas kamapim ol PCMC bilong ol insait long 12-pela mun na ripot i go long minista bilong inta-gavman rilesen na sif sekreteri bilong gavman;

3. Ol provins bai kamapim ol odit wok na senis long ol edministresen bilong ol insait long 12-pela mun na givim ripot i go long Chief Sekreteri bilong gavman aninit long stretpela ministri;

4. Ol provins i mas kamapim wanpela kain rot bilong ol samting long kamap long wod level na toksave long sif sekreteri long ol wok bilong dispela insait long 24 mun;

5. Ol provins i mas kamapim namba data ripot bilong ol insait long 12-pela mun na toksave long sif sekreteri;

6. Ol provins bai ripot long alainmen wok bilong ol wantaimn PNG Vision 2050 insait long tripela mun na toksave sif sekreteri;

7. Ol provins bai kamapim ol kopret plen bilong ol insait long 24 mun na toksave long sekreteri bilong DPLGA;

8. Ol provins bai kamapim ol wok o ples bilong kamapim gutpela wok olsem pawa na komyunikesen long wanwan distrik long narapela 10-pela yia i kam na ripot i go long gavman long aninit long sekreteri bilong DPLGA;

9. Ol provins mas kamapim ol wok we bai no inap painim planti man long mekim long distrik level na ripot long ron bilong dispela insait long tripela mun long CACC aninit long sekreteri bilong DPLGA.

10. Ol provinsal edministreta i mas lukim olsem 50 pesen bilong ol manmeri long provins bilong ol i mas save long PNG Vision 2050 em wanem samting insait long 36 mun na givim ol ripot bilong wanwan yia i go bek long gavman aninit long sif sekreteri;

11. Olgeta provins i mas kamapim na pinisim odit long olgeta plen bilong ol long Jun 2010 long redi long kamapim baset na ripot i go long sif sekreteri;

12. Ol provins i mas lukluk na stretim hevi bilong lo na oda pinis taim 2013 i kamap na ripot long gavman aninit long sekreteri bilong DPLGA;

13. Olgeta provins i mas kamapim ol wod na LLG plen we i bihainim astingting bilong PNG Vision 2050 na givim i go long sif sekreteri bipo long June 30, 2010;

14. Dipatmen bilong praim minister na NEC bai developim PNG Vision 2050 implementesin plen bipo long Jun 1, 2010; na

15. Sif sekreteri bilong gavman bai kamapim ol arapela bung olsem dispela bilong ol provinsal edministreta, ol het manmeri bilong ol arapela pablik sekta esensi na ol stekholda husat em i bilip i mas stap long dispela ol kibung.

Ol piksa ... JOHN SAMAR na THERESIA KUMO



Ol manmeri we i stap long dispela konfrens




Ekting Sif Seketari, Mista Zurenuouc long konfrens




Mista Paul Songo i strongim toktok long dispela konfrens


Tok orait long en na sainim long Lae, Morobe Provins long 26 Februari 2010.


 2. Mr Joseph Sungi
 Provincial Administrator,
 West Sepik Province





 8. Mr Joseph Dorpar, MBE
 Provincial Administrator
 Madang Province





 3. Ms Angela Mageto
 Representative for City Manager,
 Leslie Alu,
 National Capital District





 9. Dr Samson Amean
 Acting Provincial Administrator,
 Enga Province.





 4. Mr Joseph Kunda
 Provincial Administrator,
 Simbu Province.




 10. Mr Munare Uyassi
 Provincial Administrator,
 Eastern Highlands Province





 5. Mr William Powi
 Provincial Administrator,
 Southern Highlands Province




 11. Mr Malcolm Culligan
 Provincial Administrator,
 Western Highlands Province




 6. Mr Kemasang Tomala
 Provincial Administrator,
 Morobe Province





 12. Mr Gull Gorgom
 Deputy Provincial Administrator,
 Western Province




 7. Mr Kule-en Hamou
 Provincial Administrator
 Manus Province



Witnessed by:

 Mr Manasupe Zurenuoc, OBE
 Acting Chief Secretary to Government
 and Secretary for Provincial and
 Local Government Affairs



Raun wantaim Kanage olgeta wik



Maiwara bloap

KANAGE em bilong Maiwara, wanpela liklik ples long NCR, Madang provins. Em i wok wantaim RD Tuna. Wanpela taim em i wok i go na em i pilim sik. Em nau em i go tokim bosman bilong em, "Bos, mi sik nogut tru na mi tingting long go long haus". Bosman bilong em bekim, "Kanage, yu mas i go kisim marasin pastaim long haus sik. Bihain yu ken go long haus". Kanage i go long liklik haus sik bilong ol na lukim wanpela nes. Nes tokim em, "Kanage, bai mi putim glas na sekim sapos skin bilong yu hat". Nes sekim skin bilong em na tokim Kanage, "O papa, glas bilong yu i go antap olgeta!" Kanage harim dispela na em tokim nes, "Plis nes, serve mi kwikli. If not in a few minutes my temperature high, I'll blow up!"

**Freda Apelis
NCR, Madang**

Luk stil man

KANAGE em man bilong luk stil long ol meri taim ol waswas. Wanpela Sarere avinun, wanpela yangpela meri i go long waswas long wara. Kanage kwik taim ron i go pas na hait i stap. Meri kam long wara em senis na waswas i stap. Em waswas i go na em tingim toktok bilong ol meri olsem yu mas kisim was na waswas, Kanage em man bilong lukluk stil long ol meri waswas. Hariap meri ya sindaun i go insait long wara na em lukluk was long Kanage. I no long taim na ai bilong tupela pas long tupela yet. Meri ya singaut nogut tru. Kanage kirap nogut na em pundaun nating i go insait long wara. Ol brata bilong meri harim singaut bilong em na ol ron i kam wantaim ol naip na akis. Kanage hariap ron i kam autsait long wara na lek pas long as na boi lus nating long bus.

**Barna Alla
Yamok Pagwi Patrol Post
East Sepik Provins**

Mi gat senso

LONG 2009, Kanage wok olsem wanpela nait sekyuriti long Kikori Sekonderi Skul. Long nait, hetmasta i no save larim ol sumatin raun nabaut na i tambu long ol go autsait long



banis. Kanage sanap was long fran gait bilong skul. Wanpela nait, wanpela mangi K-Baks i go hait na go long get na askim Kanage long opim get long em. Kanage tokim em, "Hetmasta tok pinis, nogat sumatin bai go autsait long banis!" Mangi tanim na go bek long dometri. I no long taim, em i go bek long Kanage na askim em gen. Kanage tokim em sem toktok gen. Mangi belhat long Kanage em kisim busnaip bilong em na em i go gen long get. Kanage lukim olsem boi i kam bek wantaim naip na kwik taim em ronawe i go hait. Mangi painim Kanage i go nogat na em i go bek long dometri. Klostu tulait bruk, Kanage i go long windua long mangi K-Baks na tokim em, "Long nait yu kam painim mi wantaim bus naip. Yu mas putim was na silip long nait, bai mi karim chainsaw bilong mi na kam painim yu!". K-Baks mangi hariap i go giamanim hetmasta olsem em mas i go hariap long ples.

**Mangi NDawa
Kerema**

Givim sut tasol

KANAGE em bilong Nebilyer, insait long Ku Warr stret. Kanage wok olsem wanpela Dokta long Kairge et pos. Bihain long em wok sevenpela yia olgeta, helt dipatmen i salim em i go wok long bikpela haus sik long Hagen. Kanage wok i stap long bikpela haus sik na wanpela meri kisim bikpela bagarap long tais bilong em i kam long haus sik. Kanage kirap na tokim meri ya, "Susa, yu rausim klos bilong yu na mi givim sut long yu". Meri ya kirap na tok, "Mi pikinini Sepik ya. Yu go long baksait na givim sut long mil". Kanage suruk long toktok ya na em hariap tru na tokim ol lain long salim em i go bek long Kairge etpos.

**DP Kapu
Lae**

Ol skwat!

Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.

Email: atolire@wantok.com.pg

Bai yu i gat sans long winim "Raitman Kanage" t-siot!

NAME: Finch Mathew

KRISMAS: 18 (man)

ADRES: Ohu Primary School P O Box 169, Madang, Madang Provins

SAVE LAIKIM: pilai spots, paitim gita, go lotu na skul.

NAME: Alexie Tony

KRISMAS: 17 (man)

ADRES: Hohola Youth Centre, P O Box 1911, Boroko NCD

SAVE LAIKIM: ridim buk, harim musik, pilai spots na go long skul.

NAME: Mary Donkoh

KRISMAS: 26 (meri)

ADRES: University of Cape Coast, P O Box 294, Cape Coast, Ghana, West Africa

SAVE LAIKIM: ridim buk, senisim presen, mekim pren na laikim man long maritim.

NAME: Terence Mathew

KRISMAS: 17 (man)

ADRES: Ohu Primary School, P O Box 169, Madang, Madang Provins.

SAVE LAIKIM: go long skul, harim musik, go lotu, mekim pren na raitim pas.

NEM: Ricky Kasa

KRISMAS: 22 (man)

ADRES: P.O Box 4088, Morobe Province.

SAVE LAIKIM: Pilai ragbi, volibol, kukim kaikai, wasim kolos, wok gaden na raitim pas.

NEM: Kama Hasu

KRISMAS: 19 (meri)

ADRES: Oil Palm Industry Cooperation, P.O Box 592, Kimbe, West New Britain Province

SAVE LAIKIM: Pilai spot, makim pani, ritim buk, harim musik na lukim TV

NEM: Jenice Merinere

KRISMAS: 20 (meri)

ADRES: C/- John Wamane, P.O Box 674, Wewak

SAVE LAIKIM: Lukim TV, stori, go lotu, mekim pani na raitim pas.

NEM: Miriam Jonah

KRISMAS: 29 (meri)

ADRES: RD Tuna Canner, P.O Box 2113, Madang Province.

SAVE LAIKIM: Stori, mekim pani na harim musik.

NEM: Bright Yeboah

KRISMAS: 22 (man)

ADRES: P.O Box AD 1218, Adabraka, Ghana, West Africa

SAVE LAIKIM: Pilai futbol na raitim pas

NEM: Cecilia Mensa

KRISMAS: 21(meri)

ADRES: P.O Box AD 1218, Adabraka, Ghana, West Africa

SAVE LAIKIM: Kisim ol poto na raitim pas

Painim Tok!

Raitim daun wanem pani samting yu ting i gutpela insait long babol long poto...



BAI YU WINIM WANPELA WANTOK T-SIOT O LAPLAP!

Salim i kam long: Pani Toktok Kompetisen, P.O. Box 1982, Boroko, NCD Port Moresby - Sapos mipela i lukim wanem samting yu raitim i gutpela bai yu winim wanpela Wantok T-Siot o laplap na bai mipela i putim i go insait long pepa.

Nem:..... Adres:.....

Krismas bilong yu:..... Telepon:.....

Yu baim Wantok niuspope long wanem hap:.....

(Rot, Maket, Stua).....

Karim long hia.....



Program bilong Wanwan De

Mande - Fraide

6am - 10am - Sankamap show - Host: KAS.T
 6:15am - Komuniti Notis Bod
 6:30am - Nius Hetlains / Bondei grittings
 Trukai Rais - GES FAIA KOMPETISEN
 6:45am - Niuspepa Hetlains
 7:00am - Major Nius Bulletin - YUMIFM Nius Senta
 7:15am - Toktok sapolim LO na JASTIS Sekta
 7:30am - Trukai Rais - GES FAIA KOMPETISEN
 8:00am - Major Nius Bulletin - YUMIFM Nius Senta
 8:15am - Stori b'long Skelim Tingting
 8:30am - Trukai Rais - GES FAIA KOMPETISEN
 9:00am - Nius Bulletin - YUMIFM Nius Senta
 9:15am - Luksave long Komuniti (Redio Pilai)
 9:30am - Trukai Rais - GES FAIA KOMPETISEN

9:45am - YUMI PAINIM WOK Segment
 10:00am - Nius - YUMIFM Nius Senta
 10am - 2pm - Monin Trek na Belo Pack - Host: VAVIESSIE
 10:10am - Lukatim yu yet - Helt toktok - RH Hyper Mart
 10:45am - YUMI PAINIM WOK Segment
 11:00am - Nius - YUMIFM Nius Senta
 11:10am - Cont'd - Lukauti yu yet - Helt toktok
 11:30am - Nius Hetlains b'long Belo Taim
 12:00pm - Major Nius Bulletin - YUMIFM Nius Senta
 12:10pm - BELO Taim - wantaim sapat b'long TELIKOM
 12:15pm - Komuniti Notis Bod
 12:20pm - BELO Taim - wantaim sapat b'long TELIKOM
 1:00pm - Nius - YUMIFM Nius Senta
 1:10pm - BELO Taim - wantaim sapat b'long TELIKOM
 2:00pm - Major Nius Bulletin - YUMIFM Nius Senta
 2pm - 6pm - Avinun Draiv Taim - Host: Enjo Dabix
 2:00pm - 4:00pm (Tunde / Fondei) TOKAUT TOKSTRET
 2:45pm - YUMI PAINIM WOK Segment
 3:00pm - Nius - YUMIFM Nius Senta

3:10pm - Avinun cruz
 4:00pm - NIUS - YUMIFM Senta
 4:10pm - "FOAPELA KAM GUD LONG 4"
 4:30pm - Nius Hetlains
 4:45pm - YUMI PANIM WOK Segment
 5:00pm - MAJOR NIUS BULLETIN - YUMIFM Nius Senta
 5:10pm - 6:00pm - FLAME KULCHA (1 hr) listeners request
 6:00pm - MAJOR NIUS BULLETIN - YUMIFM Nius Senta
 6 - 7pm - Maggi noodles request aua
 6pm - 00am - NAIT BEAT - Host: ANGRA KENNEDY
 6:10pm - 7:00pm Mun kamap sho
 6:45pm - Komuniti Notis Bod
 7:00pm - 9:00pm - COCA COLA GARAMUT
 9:00pm - 00am - Nait Beat - Isi Cruz long nait
 00am - 6am - BRUKIM TULAIT SHOW - Host: Papa Raegs / Sally / Nenge
 00:00 - Early Monin Taim Cruz (ol lain brukim tulait shift)
 - Miusik / Request / Tok pilai
 - Kipim Kampani long ol nait shift.

Weekend Shift - Saturday & Sunday
 6:00am - 11:00am - Wiken Sanrais
 6:30am - Komuniti Notis Bod - Bondei grittings
 7am - 9am - Wiken Spots
 9am - 11am - Monin Raun
 11am - 1pm - National Weekly Hit Parade (Host Kas.T)
 2pm - 6pm - Sarere Avinun Draiv
 6pm - 00am - Nait Beat (Host Angra Kennedy)

YUMIFM POROMAN TEAM:
 Turner (KAS.T) Arifeae - Team Leader / Program Director
 Angra KENNEDY - Senior Announcer
 Sinimil (Vaviessie) Philipo - Promotions Co ordinator
 Papa Raegs - Announcer Nenge Neings - Announcer
 Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM

HARIM LONG: 101.9 FM

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Spots
 7.30PM Nius na Karen Afecas
 8PM Helt
 8.15PM Musik
 8.30PM NIUS
 8.40PM Spots Riplei
 8.55PM Musik
 9PM Stesen Pas

TUNDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chit
 7.30PM Nius na Karen Afecas
 8PM Mama Graun
 8.15PM Musik/Spots
 8.30PM NIUS
 8.40PM Helt Riplei
 8.55PM Musik
 9PM Stesen Pas

TRINDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chit
 7.30PM Nius na Karen Afecas
 8PM Focus
 8.15PM Musik/Spots
 8.30PM NIUS
 8.40PM Mama Graun Riplei
 8.55PM Musik
 9PM Stesen Pas

FONDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chit
 7.30PM Nius na Karen Afecas
 8PM Youth
 8.15PM Musik/Spots
 8.30PM NIUS
 8.40PM Focus Riplei
 8.55PM Musik
 9PM Stesen Pas

FRAIDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chit
 7.30PM Nius na Karen Afecas
 8PM Wantok
 8.15PM Musik
 8.30PM NIUS
 8.40PM Youth Riplei
 8.55PM Musik
 9PM Stesen Pas

SARERE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Wantok
 8PM Lokal Ben
 8.30PM Nius
 8.40PM Musik/Chit Chat
 9PM Stesen Pas

SANDE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Femili Blong Serah (Redio Plei)
 8PM Lukluk Bek Long Wik
 8.30PM Nius
 8.40PM Musik/Chit Chat
 9PM Stesen Pas

Raun wantaim Wantok kru...

Hula famure!



HULA HULA !Ol pikinini meri skul sumatin long pastaim ManeaManea Prameriki skul long ples Hula insait long Sentrel provins i wokim gutpela Hula Hula danis long welkamaim na amamasim ol bik manmeri i kamap long dedikesen seremoni bilong Allan Jones, wanpela man Saut Australia i bin wok tisa long hap namel long 1969-1974 we pipel i givim bikpela luksave long wok bilong em. Moa long 2,000 pipel i bin stap long dedikesen seremoni we i lukim nem bilong skul i senis i go long Allan Jones Memoriel skul. Narapela bikpela samtign tu em tupela meri kandere bilong Mista Jones husat i dau pinis i bin karim es (dai bodi ol i kukim na ol bun es) bilong em i kam long planim long skul graun. Selebresen I bin kamap gut stret na pinis wantaim kaikai. *Ol Poto n a stori: Veronica Hatutasi*

EMTV Television Guide

FONDE MAS 4, 2010

5.00AM G JOYCE MEYER - Religious Program
 5.30AM G TODAY
 9.00AM EMTV PRIME TIME LINEUP
 2.59PM STATION OPEN
 KIDS KONA
 3.00PM G PINKIE PIXEL
 3.30PM G HI-5
 4.00PM G SNOBS (return)
 4.30PM G THE SHAK
 5.29PM G EMTV NEWS UPDATE
 6:00PM G NATIONAL EMTV NEWS
 6.30PM G A CURRENT AFFAIR
 6.59PM G NEWS UPDATE IN TOK PISIN
 7.00PM G SPORTS SCENE
 7.27PM G EMTV TOK SAVE
 7.30PM G RAIT MUSIK
 Produced by CHM, each week get a dose of your own, home-grown and locally produced video clips including the latest music video clips.
 ALL NEW
 8.30PM PG ELITE MUSIC ZONE
 9.00PM M ADULTS ONLY 20 TO 1: World's Most Daring Movies
 10.00PM G NATIONAL EMTV NEWS REPLAY

10.30PM M LADETTE TO LADY
 11.30PM Australia Network

FRIDAY, MAS 5, 2010

6.59AM G STATION OPEN
 7.00AM G JOYCE MEYER: Enjoying Every Day Life
 9.00AM EMTV PRIME TIME LINEUP
 CLASSROOM BROADCAST
 9.20am -Grade 7 Mathematics (repeat)
 10.10am -Grade 7 Science (repeat)
 11.00am -Grade 8 Mathematics
 11.50am -Grade 8 Science
 12.40pm -Grade 6 Mathematics (repeat)
 1.30pm -Grade 6 Science (repeat)
 2.59PM STATION OPEN
 KIDS KONA
 3.00PM G DOGSTAR
 3.30PM G HI-5
 4.00PM G SNOBS
 4.30PM G THE SHAK
 4.57PM G EMTV TOK SAVE
 5.00PM G HOT SOURCE
 5.29PM G EMTV NEWS UPDATE
 5.30PM G WHO WANTS TO BE A MILLIONAIRE - HOT SEAT
 CRIME STOPPERS
 5.55PM
 6:00PM G NATIONAL EMTV NEWS

6.30PM G A CURRENT AFFAIR
 7.00PM G IN MORESBY TONIGHT
 7.27PM EMTV TOK SAVE
 7.30PM PG PREMIERE SPECIAL EVENT
 Making of Michael Jackson - This Is It
 Making Michael Jackson - This Is It, goes behind the scenes and looks at the making of the greatest concert that never happened, complete with interviews from the directors, musicians and dancers who worked with MJ, and exclusive rehearsal footage from the motion picture.
 7.57PM EMTV TOK SAVE
 8.00PM G SUPER 14
 Chiefs v Reds - from Hamilton, New Zealand.
 Round-robin competition between teams from Australia, New Zealand and South Africa.
 10.00PM M 20 TO 1: Celebrity Exposed
 10.00PM G NATIONAL EMTV NEWS REPLAY
 112.00PM Australia Network

SARERE MAS 6, 2010

11.59AM STATION OPEN
 12.00PM G HI-5
 12.30PM G THE SHAK
 1.00PM G THE PACIFIC WAY
 2.00PM PG THE SENSITIVE SAMURAI

3.00PM PG SURVIVOR SAMOA
 4.00PM G TOTAL RUGBY
 4.30PM G WINTER OLYMPICS HIGHLIGHTS
 5.30PM G MXTV
 6.00PM G NATIONAL EMTV NEWS
 6.30PM PG AUSTRALIA'S FUNNIEST HOME VIDEO SHOW
 OUR CHILDREN OUR HOPE OUR FUTURE
 7.57PM EMTV TOK SAVE
 8.00PM G SUPER 14
 Waratahs v Sharks, from Brisbane.
 Round-robin competition between teams from Australia, New Zealand and South Africa.
 10.00PM PG IN MORESBY TONIGHT
 10.30PM PG ELITE MUSIC ZONE
 10.30PM G NATIONAL EMTV NEWS REPLAY
 11.00PM PG AIRLINELIGHTS
 Midnight Australia Network

SANDE MAS 7, 2010

6.30AM G IT IS WRITTEN: Growing Through Tough Times: Surviving Depression - It Is Written is an international, Christian television ministry dedicated to sharing insights from God's word

with people around the world.
 7.00 G HILLSONG
 7.30AM Australia Network
 4.59PM STATION REOPEN
 5.00PM G WINTER OLYMPICS HIGHLIGHTS
 6.00PM G NATIONAL EMTV NEWS
 6.30PM G MONEY FOR JAM
 7.00PM G MIND YOUR BUSINESS (return for 2010) A monthly business program focusing on business and financial issues affecting PNG.
 ALL NEW
 7.30PM G 60 MINUTES (return for 2010) 60 Minutes features an award-winning blend of investigative reporting and exclusive news and insights from around the world in a highly entertaining and engrossing magazine format. **ALL NEW**
 8.30PM M SUNDAY NIGHT MOVIE: LORD OF THE RINGS: THE TWO TOWERS (2002) Action/Adventure/Fantasy - Frodo & Sam continue on to Mordor in their mission to destroy the One Ring. Whilst their former companions make new allies and launch an assault on Isengard
 Stars: Sean Astin, Elizah Wood, Bruce Allpress

TORO



BIABIA



KANAGE



TOKWIN

Susaid boma...

PNG i nau kamap olsem Midul Is. Raskol i kilim em yet wantaim bom taim ol polis i laik arestim. Tarangu long dispela asua, polis meri i dai na tupela arapela polisman i kisim bagarap. Mt Hagen bipo em wanpela pisful taun biutiful taun tu. Nau, yu bai pret long raun bikos planti pikpoket i pulap. Man i karim naip na gan raun. Las wik tasol, ol polis i laik holim pasim wanpela raskol na raskol i rausim hanbom na blowim em yet na polimeri. I no stail bilong PNG tru.

Toktok i go olsem. Raskol i rausim bom na rausim pin bilong bom long pretim ol polis. Tasol abrus na bom i pairap long han bilong em na kilim em yet wantaim polimeri husat i stap klostu. Sapos yu laik kilim yu yet, plis go long we na kilim yu yet. Maski kisim ol arapela manmeri wantaim yu!

Husat dispela politisen i raskol...

Benk roba, William Kapis i nau tokaut olsem sampela ol politiks man i bin stap insait long ronawe bilong em. Long Palamen sindaun memba bilong Bulolo, Sam Basil i

mekim toktok i go long Minista bilong Jastis, Dokta Allan Marat long painimaut husat ol dispela politiks man na givim nem hariap, bikos nau ol manmeri i lukim ol minista raun, ol bai save em wanpela raskol yah! Hahahaha! naiswan! yu yet skelim.

Tenkyu long hatwok bilong Polis...

Klostu nau ol raskol husat i bin ronawe long bipo yet i wok long go bek long kalabus. Sampela i ronawe long tupela yia i go pinis i wok long kamaut. Tenkyu long ol pablik husat i wok long tipim ol polis long we ol kalabus i hait i stap.. Tokwin Tasol...

Word search grid with letters T, M, U, S, M, U, S, P, L, P, D, B, I, N, E, N, M, U, M, U, T, P, U, R, N, E, A, W, S, C, V, N, P, Y, R, D, F, R, U, P, W, A, X, L, U, R, Y, I, A, L, I, U, I, K, Y, D, A, C, T, U, A, O, S, S, U, I, E, P, K, L, D, O, N, K, I, N, F, I, G, H, L, M, O, B, O, P, R, T, Y, K, I, F, A, X, C, P, E, T, E, S, K, P, U, S, I, P, O, O, R, T, B, B, M, I, X, M, I, I, L, I, U, Y, T, R, E, R, D, F, I, J, K, K, E, K, B, K, S, I, P, S, I, P, Y, O, C, N, Z, A, V, K, O, R, A, Q, W, E, R, K, D, F, G, S, A, P, P, I, O, B, I, U, P, K, R, U, U, I, O, P, K, T, F, O, T, Y, K, A, S, W, R, A, E, S, N, E, K, A, A, T, S, P, O, A, L, D, O, K, I, P, S, D, F, G, H, N, J, A, K, L, L, P, W, A, S, D, T, U, C, G, U, I, G, S, R, E, G, B, A, K, D, F, G, H, K, L, P, O, Y, T, R, G, P, N, Z, T, Q, F, G, P, U, K, P, U, K, K, L, P, O, F, A, X, A, A, N, I, S, N, M, B, U, L, M, A, K, A, U, L, S, B

Painim ol dispela nem bilong ol animal na binatang:


Table of animal names: ANIS, MUMUT, MUSMUS, BINEN, BULMAKAU, BATAPLAI, BIKBEL, MURUK, PUSI, KAU, KAKARUK, KOKOROS, LUKPUK, KAPUL, DOK, DONKI, LAUS, LANG, BLAKBOKIS, PAUL, PALAI, MEME, GRASOPA, BINATANG, SIPSEP, SNEK, NATNAT, PIK

4x7 grid with numbers: 4, 5, 3, 1, 7; 1, 2, 6, 5; 9, 8, 7; 1, 8, 3, 2; 3, 7, 8; 8, 2, 5, 4, 3; 5, 4, 6, 8, 4; 3, 7, 5, 8, 9

9x9 grid with numbers: 3, 2, 2, 6, 7, 9, 1, 5, 4; 9, 7, 6, 4, 1, 5, 3, 2, 8; 1, 4, 5, 3, 2, 8, 9, 6, 7; 5, 6, 4, 8, 3, 1, 2, 7, 9; 8, 2, 1, 9, 6, 7, 5, 4, 3; 7, 9, 3, 2, 5, 4, 8, 1, 6; 2, 1, 9, 7, 8, 6, 4, 3, 5; 6, 3, 8, 5, 4, 2, 7, 9, 1; 4, 5, 7, 1, 9, 3, 6, 8, 2

Ansa bilong las wik Sudoku

Ansa bilong las wik Pasol



EMTV Television Guide

EMTV Television Guide listing programs and times for Mas 8, 9, and 10, 2010. Includes programs like TOK PIKSA, NATIONAL EMTV NEWS, JOYCE MEYER Religious Program, EMTV PRIME TIME LINEUP, CLASSROOM BROADCAST, SURVIVOR: SAMOA, ACADEMY AWARDS, EMTV TOKSAVE, OUR CHILDREN OUR HOPE OUR FUTURE, THE EARLY CHILDHOOD CARE DEVELOPMENT POLICY, WINTER OLYMPICS, THE BACKYARDIGANS, THE PYRAMID, THE SHAK, EMTV TOK SAVE, HOT SOURCE, EMTV NEWS UPDATE, WHO WANTS TO BE A MILLIONAIRE, NATIONAL EMTV NEWS, A CURRENT AFFAIR, HAUS & HOME, NEWS UPDATE, IN TOK PISIN, THE WORLD AROUND US, THE PEOPLE'S GAME, RESCUE SPECIAL OPS, WEDNESDAY NIGHT MOVIE: THE BLUE BUTTERFLY, EMTV NEWS UPDATE, WHO WANTS TO BE A MILLIONAIRE, NATIONAL EMTV NEWS, A CURRENT AFFAIR, JOYCE MEYER Religious Program, EMTV PRIME TIME LINEUP, STATION OPEN, THE BACKYARDIGANS, HI-5, THE PYRAMID, THE SHAK, EMTV TOK SAVE.

Hula pipel tingim long taim tisa poroman

Veronica Hatutasi i raitim

TULAIT long Fonde moning i wok long bruk tasol ples i tudak yet.

Tasol isi isi, namel long ol diwai, mi lukim ol liklik hap lait i brukim tudak na traim long kamaut namel long ol han lip. Taim em i haf pas 5 moning. Ol pisin tu i kirap pinis na wokim nois nabaut.

Mi kirap na redi pinis bikos long tude, wanpela wok bai kamap long Manea Manea Praimeri skul long Hula, wanpela ples long Magi Haiwe. Em i save kisim tu na haf o tripela awa ron long kar long Mosbi siti i go long Hula.

Long haus, ol famili i slip yet na samting olsem 6.20 am, bos bilong mi i go lusim mi long NBC 5 mail bas top. Dispela em bas stop we ol manmeri i laik kisim ol PMV haiwe bas na trak i go olsem long Magi Haiwe i save wet long em.

Bihain mi wet long sampela taim long hap, ol narapela ripota bilong ol niuspepa, redio na televisen stesen i kam na mipela i wetim kar bai kisim mipela i go long Hula.

I no long taim na wanpela blupela 15-sita bas i kam wantaim tupela waitmeri tu insait. Em dispela bas tasol i kisim mipela i go long Hula.

Meri i go pas long dispela wok-about na wok, Dokta Vele Pat Tuaru i singautim mipela long go sindaun long bas. Na bihain mipela i wokim ol liklik ron long siti long kisim ol samting long kisim wantaim mipela olsem hetston, memorial plak na ol samting olsem, mipela i lusim siti long 8.30 moning stret na bihainim Magi Haiwe rot.

Dispela wok we mipela i go long kisim stori na ol piksa long en em dedikesen seremoni bilong tingim wanpela tisa bilong Adelaide, Saut Australia husat i bin wok olsem tisa long Manea Manea skul long 1969 inap long 1974. Na long PNG, em i wok tisa 42 yia olgeta. Nem bilong em Allan Jones.

I no long taim i go pinis wantaim 70 krismas, Mista Jones i bin kisim sik long lewa bilong em i bungim hevi na em i pundaun na dai. Dispela em long haus bilong em long Adelaide yet.

Olgeta lain long PNG husat i save long Mista Jones i laikim em long wok na pasin bilong em we i mekim na planti bilong ol i lainim ol gutpela pasin, stap helti na klin olgeta taim, givim luksave long ol meri long kisim gutpela save na holim ol bikpela wok long sios, gavman na praiwet sekta. Tasol bai yumi skruim ol toktok long dispela bihain.

Liklik stori bilong Mista Jones i olsem. Em i bin kam long PNG long yia 1964 bihain tasol long em bin greduet long Australia Pasifik Edministresen. Namba wan skul em i



TUPELA KANDERE: Kathee Bowyer na Louise Jeffery tupela kandere bilong Allan Jones i kam long witnessim dedikesen na planim sitpaia bodi bilong em.

Poto: Veronica Hatutasi



GO PAS: Ol sumatin i go pas long kisim ol ges long ples bilong sindaun na go hetim seremoni. Poto: Veronica Hatutasi

bin wok tisa long en em long Daudmagini komyuniti skul long 1964-1968 na Hula long 1960-1974.

Bihain em i go bek long skul na kisim Basela bilong Edukesen digri na em i go kamap hetmasta long Karkar Hai skul long Madang provins long yia 1979 -1986.

Popondeta Hai skul long Oro provins em neks skul em i tisa long em long yia 1989-1993.

Las skul em i wok long en em long Cameron Sekonderi skul long Milen Be provins long 1994-1999. Bihain long dispela, em i ritaia long wok tisa tasol em i skruim wok long PNG wantaim AESOP bisnis volantia grup inap long 2002 taim em i pinis wok olgeta long PNG na go bek long ples bilong em Adelaide. Tasol taim em i stap long PNG na em i go long ol Krismas malolo long Adelaide, em i bin save kisim sampela ol sumatin pikinini man na meri i go wantaim em. Planti i tingim em olsem papa bilong ol husat i lukautim ol gut stret na soim bikpela laik pasin i go long ol. Em i bin wok tu long ol planti sariti wok

long en long em.

Na ol sumatin we em i bin tisim na lukautim ol i tingim em na wokim samting long em na wok na memori bilong em i ken stap long ol yia i kam.

Olsem na tupela kandere meri bilong em, Kathee Bowyer na Louise Jeffery, i bin karim ol es (ash) bilong em i kam long bek olgeta i kam long Adelaide long planim long Manea Manea Praimeri skul. Narapela em long senisim nem bilong Manea Manea skul i go long Allan Jones Memorial skul.

Taim bas i karim mipela i go kamap long skul long 11 kilok samting, samting olsem 560 sumatin i bilas gut na moa pipel bilong 6-pela ples long Hula eria i bung na redi pinis long dedikesen seremoni. Naispela skul tasol sampela ol klasrum ol i bin sanapim long taim bilong koloniel o gavman bilong Australia i lukautim PNG moa long 60 yia i go pinis i stap yet. I gutpela sapos ol i ken rausim na sanapim ol nupela long kisim ples.



MEMORI: (L-R) Sanapim hetston na Memori Plak em wanpela bikman long ples, Dokta Vele Tuaru Pat, Louise Jeffery, Kathee Bowyer na ol narapela pren na eks sumatin bilong Allan Jones.

Poto: Veronica Hatutasi

long eduksen long Malawi na Uganda long Afrika na Ingran.

Kisim yupela i go bek long dedikesen de long Hula las Fonde, bikpela samting em long sanapim ol memori bilong leit Allan Jones long wanpela long ol skul we em i bin mekim bikpela hanmak bi-

Kanusela Sif Noga long welkam seremoni long tupela spesel ges, Kathee na Louise, ol narapela ges olsem ol bik manmeri bilong Sentrel provinsel eduksen, ol midia na pablik olsem "dispela em i wanpela spesel de bai go daun long histori bilong skul na Hula. Na em i bin autim luksave long Dokta Vele Tuaru Pat, wanpela long ol sumatin bilong Allan Jones, olsem wanpela gutpela piksa (role model) bilong ol meri ol yangpela meri bilong tude i ken bihainim. Em bin tok maski, pasin lastim bilong PNG em ol man i bos, Dokta Vele i sanap strong na mekim mak bilong em long sanap long wankain level na skruim wok i go strong.

Sentrel provinsel Asisten edukesen Sekreteri, Paul Hatagen i bin tokim ol sumatin olsem as tingting bilong ol long go long skul em "long lainim ol samting bai helpim ol long laip bilong ol."

Mista Hatagen i bin luksave long bikpela na gutpela wok bilong Allan Jones na em yet i in go pas long wokim dedikesen long senisim nem bilong skul i go long Allan Jones Memorial skul stat yet long las Fonde.

Olgeta ol eks sumatin bilong Allam Jones i bin gat ol gutpela memori long tisa bilong ol we bikpela samting em i bin strongim long skul, wok na laip em long "discipline" o bihainim na mekim gutpela pasin, toktok tru, man bilong wok hat, ol sumatin i mas stap klin olgeta taim.

"Em i wanpela hatpela man we mi lainim planti gutpela samting long en. Taim mi go wok wantaim ami, "discipline" o stretpela pasin mi lainim long em i bin helpim mi gut long wok na stap bilong mi," wanpela man Makerupu sumatin bilong Allan Jones i tok.

"Bikos long gutpela na hatpela skul we mipela i mas givim luksave long ol narapela na moa yet, ol merina, mipela i stap. Taim em i lukim ol mama i karim ol hevi samting, em i save mipela bilong go helpim ol. Malolo taim em i save kisim mipela i go long Australia em i miks long olgeta samting. Em i taim bilong malolo na amamas tasol i taim bilong lainim nupela samting," narapela sumatin bilong em bilong Kwikila husat nau i wanpela fisaman i tok.

"Em i eksen man bilong strik disi-

plin na stikim mipela sapos mipela i wokim samting i no stret. Em i save laikim bai mipela i mas klin, mekim gut long ol narapela, putim ol gutpela klinpela klos. Mi bin lainim planti samting long em," Joy Kala nau i wok wantaim bemobile na husat Allan i save kolim em "Joybells" i tok.

Kila Sergeant nau i wanpela Asembli ov God pasto wantaim man bilong em bilong ples Makerupu i bin wanpela eks sumaitn biong Allan i tok, "Disipline na stap klinpela olgeta taim em ol samting mi lainim na i helpim mi long yusim long wok bilong mi insait long famili na komyuniti. Mi amamas olsem mi bin wanpela sumaitn bilong Mista Jones," Pasto Kila i tok.

Man i makim Manea Manea skul bot i bin tok skul i gat 50 krismas nau bihain long ol i bin kirapim long uia 1957. Em i tok ol pipel na papa long 8-pela viles i gat samting olsem 15,000 pipel i save wok hat long kamapim mani na mekim ol wok bikos eria i nogat planti samting long kisim mani long en.

Olsem na em i bin putim tupela askim long ol bikman bilong distrik na provinsel eduksen long helpim ol wantaim. Em long ol infrastraka projek olsem senisim ol olupela bilding we i olupela pinis na, sanapim wanpela nupela de hai skul long eria. Long bekim askim bilong ol, distrik eduksen bos i bin tok ol bai lukluk long tupela askim bilong ol.

Tupela kandere meri bilong Allan i bin amamas tru long helpim we ankel bilong ol mekim long ol Hula pipel na i bikpela luksave we ol pipel i givim long em. Na ol bai kisim olgeta samting ol i lukim na harim i go bek long Adelaide long dispela wik.

De i bin pinis wantaim nem senisim ol i raitim long memori pleik na hetston ol bai sanapim antap long ol bun ol i planim aninit long skul eria. Bihain i bin gat kaikai, stori wantaim na taim san i wok long go daun, mipela i kalap gen long bas na bihainim longpela rot i kam bek long Mosbi. Tasol em i bin gutpela long lusim paspas Mosbi siti na ol kain kain samting i save kamap, long go aut kisim gutpela win na netsa na kliatim het na tingting liklik.

PNG LNG projek na CPC pinisim Salim na Baim Tok Orait

ESSO Hailans Limited, han kampani bilong bikpela ges kampani ExxonMobil Koporesen na kampani i go pas long PNG Likwifait Netersal Ges (LNG) Projek i tokaut long 2 Mas, 2010 olsem olgeta poroman kampani long LNG projek i pinisim olgeta toktok bilong Salim na Baim Tok Orait (SPA) ges.

Tok Orait Exxon Mobil i kamapim em wantaim CPC Koporesen bilong kantri Taiwan.

Dispela Tok Orait i tok klia olsem kampani bai salim inap olsem 1.2 milien tan ges long CPC long wan wan yia.

Aninit long dispela tok orait,

PNG LNG Projek bai salim LNG i go long CPC inap long 20 yia.

"Dispela i bikpela tok orait wantaim CPC we mipela bai givim gutpela na klinpela ges i go long Taiwan.

"Taiwan i gat bikpela indastri na laik bilong kisim pawa i bikpela tru.

"Mipela nau i lukluk long go het long toktok wantaim ol benk long fandim na kamapim PNG LNG Projek long namba wan kwata bilong 2010," Ron Billings, Vais Presiden bilong LNG, ExxonMobil i tok.

Em i tok kamap bilong dispela tok orait i opim rot bilong ol arapela baia bai kam insait.

Developmen bilong PNG

LNG projek i kisim tu wok bilong ges prodaksen na prosesing fektori we bai stap long graun na long solwara wantaim.

Dispela ol fektori bai kamapim inap olsem 6.6 milien tan long wan wan yia.

Ol arapela kampani husat i bung wantaim ExxonMobil long kamapim dispela projek em Esso Hailans yet wantaim 33.2 pesen sea, Oil Search Limited (29 pesen), Indipenden Pablik Bisnis Koporesen (PNG Gavman 16.6 pesen), Santos Limited (13.5 pesen) Nippon Oil Exploresen (4.7 pesen), Mineral Risoses Developmen Kampani (PNG papagraun 2.8 pesen) na Petromin (0.2 pesen.)



GES ILAIT: InterOil Antelope-2 ges i paia lait long taim kampani i laik soim strong bilong ges i stap.

LNG projek kamapim salens: Somare

Paul Zuvani i raitim

BIKPELA salens bilong gavman em bilong lukim ol manmeri long ples i gat rot, haus sik, marasin, skul, mekim bisnis na kisim ol arapela sevis bihainim kamap bilong LNG projek (PNG LNG).

Na long mekim olsem wok i no isi, dispela i mas kisim taim, strong na sapot bilong gavman tu.

Kos bilong developim dispela projek i sanap olsem K42 Bilion (US\$15 B) tasol dispela bai antap moa taim ol olgeta arapela samting i pas long wok bilong em i kamap.

Dispela i tok bilong Praim Minista Gren Sif Se Michael Somare long taim em i givim tok long taim bilong saining bilong laspela hap bilong tok orait bilong kamap bilong projek namel long gavman na ol projek patna em Esson Hailans Limited (hap han bisnis grup bilong ExxonMobil), Oil Search Limited na Santos.

Dispela saining i bin kamap long Palamen Haus long Tunde dispela wik.

Tupela samting gavman i plen na i laik kamapim long lukautim mani i kam long LNG projek em:

- KAMAPIM Sovren Fan; na
- STEBELAISESEN Fan (em Tresera na Fainens Minista Patrick Pruaitch i tokaut long welkam toktok bilong em).

Long Sovren Fan, gavman bai yusim dispela mani long Developmen Baset bilong en long kamapim ol rot, skul, haus sik na ol arapela

pablik sevis.

Long Stebelaisesen Fan, gavman bai yusim mani taim em i bungim taim nogut long Mani Plen bilong en long bihain.

Ol tok bilong rot bilong yusim dispela ol mani bai kamap klia taim Dipatmen bilong Nesenel Plening na Monitaring i tokaut long 20-Yia-Plen bilong en long stat bilong 2010.

Paipain bilong LNG bai stat long Sauten Hailans na bihainim 700 kilomita mak i kam long Galp Provins na bihain kam long Boera ples, Sentrel Provins ausait tasol long Mosbi siti.

Ol savemanmeri bilong Siapan, Australia na Amerika i helpim long kirapim dispela projek.

Long ol manmeri bilong Sauten Hailans na Galp Provins, kampani bai mekim bikpela ples balus long Komo long Sauten Hailans na wokim Haiwe i go daun long Kikori long Galp Provins na stretim Hailans Haiwe na ol bris i stap long em.

Dispela projek bai stap inap long tripela-ten krismas (30).

"Gavman bai lukim olsem em i was na lukautim gut mani em i kisim long ges projek.

"Long mekim olsem em i laik bringim gutpela sevis long ol pikinini bilong en long sait bilong edukesen, helt na ol arapela sevis.

"Bikos long dispela PNG gavman wantaim helpim i kam long gavman bilong Australia i laik kamapim wanpela sovren fan (bikpela akaun) long sevim winmani em kisim long ges projek bai bihain taim em bai yusim long kamapim gutpela sindaun

bilong ol manmeri.

"Planti bilong dispela mani bai go long Developmen Baset long stretim ol rot na sosel infrastruktsa.

"Gavman bai yusim tu mani i stap long dispela akaun long ol arapela developmen wok we bai kamap long bihain taim," Se Michael i tok.

Em i tok long taim projek i stat planti mani bai go aut.

Dispela em bikos planti bilong ol masin na ol saveman bilong ronim dispela ol masin bai kam long narapela kantri.

Tasol long stretim dispela hevi ExxonMobil i tok orait long kamapim tripela skul bilong skulim ol lokol manmeri long kisim save na yusim dispela ol masin.

"Tupela teknikal skul i kamap we wanpela long Mosbi na narapela long Juni long Sauten Hailans."

"Narapela bai kamap long LNG Plent sait (Boera, Sentral Provins).

"Wantaim dispela mi save olsem long namba tri LNG Tren, bai i gat inap savemanmeri long Papua Niugini yet husat bai yusim dispela ol masin long mekim dispela ol wok."

Kantri bai lukim bikpela senis long kamap bilong ges projek na gavman i gat plen long kamapim tripela ges projek.

Wanpela projek nau em ExxonMobil i go pas long em na kisim ges long Sauten Hailans Provins, narapela em InterOil long Galp Provins na namba tri projek em long Westen Provins we Talisman Eneji bai go pas long em.

Isten Hailans namba wan provins long kisim Kemish

ISTEN Hailans provins i namba wan provins we nupela Australia Hai Komisina long Papua Niugini lan Kemish, AM, i go long em.

Mista Kemish i go wantaim meri bilong en Mis Roxanne Martens dispela i namba wan wokabaut bilong Hai Komisina bihain long em i kisim nupela wok long PNG.

Go wantaim tupela em Hetmeri bilong AU-SAID long PNG, Stephanie Copus-Cambell.

Long Isten Hailans bung bilong ol bai stat wantaim provinsel edministresen na bihain go long Gavana Mal Smith na Provinsel Edministreta Munare Uvassi na bihain go long NBC Redio na mekim sampela toktok.

"Dispela i stat bilong



EHP PASTAIM: Ian Kemish, Australia Hai Komisina.

plen mi gat long wok-about long PNG long taim mi stap hia," Mista Kemish i tok.

Bihain long NBC, Goroka em bai go long Bihute Haus Kalabus long Tunde avinun na bihain go long Institut bilong Medikal Risets (IMR).

"Mi lukluk go het

long kamap long IMR. Mi save gut long dispela senta long wanem em i gat nem long wol long risets wok bilong en moa long sait bilong sik malaria."

Namba wan de Hai Komisina bai bung wantaim Isten Hailans Samba bilong Komasa.

Long Trinde em bai lonsim 4-yia kopi projek long Goroka we Australia Senta bilong Intanesenel Agrikalsa Risets i fandim.

Na as tingting bilong dispela projek em bilong apim mak bilong kopi em provins i kamapim long dispela taim i go long narapela 10 pesen.

Dispela em bilong ol liklik kopi groa.

Bikos long nius bilong kamap bilong HIV long Hailans rijen Hai Komisina bai bung wantaim Goroka NGO grup em Care Intanesenel, Save the Children, Clinton Faundesen, Oxfam, Appropriat Teknoloji Projeks na Isten Hailans Famili Vois, dispela olgeta lain i save kisim fanding long PNG-Australia developmen patnasip.

Hai Komisina bai go tu long Asaro Helt Klinik we Clinton Faundesen i save ronim.

"Australia na PNG Gavman i save wok bung wantaim long planti kain kain projek long Isten Hailans provins."

"Na mi lukluk tasol long wok bung wantaim Gavman bilong PNG long wanem ol wok i kamap," Kemish i tok.

long Australia Senta bilong Intanesenel Agrikalsa Risets (ACIAR) na i hap bilong projek we bai kamap long olgeta hap bilong kantri.

"Kaikai bilong dispela projek bai strongim wok ikonomi, sosel na envoirnmen long ol liklik fama na givim tingting long ol arapela kopi fama long PNG olsem ol we Wol Benk i fandim."

Kemish i tok tenkyu long Kopi Industri Koporesen, Nesenel Agrikalsa Risets Institut na ACIAR long gutpela wok poroman pasin long strongim indastri long ol taim i kam.

ol bikos dispela ol man i groim kopi indastri na strongim ekonomi bilong kantri.

Na wantaim dispela sapot progrem dispela bai helpim ol long go moa yet long ol yia i kam.

"Dispela projek bai helpim ol kopi groa long ol tingting ol i gat long kain kopi gaden o plentesin ol i gat laik long kamapim.

"Dispela projek bai helpim ol famili, moa long ol meri na yangpela long rot bilong skulim ol long kamapim gutpela gaden," Kemish i tok.

Dispela projek em gavman bilong Australia i sapotim aninit

Australia sapotim PNG Kopi Industri

AUSTRALIA Hai Komisina long Papua Niugini, Ian Kemish, i lonsim foa-yia kopi projek bilong ol liklik smolholda kopi fama long Goroka, Isten Hailans Provins long pinis bilong mun Februari.

I gat save olsem kopi i wanpela bikpela samting we ol manmeri bilong Hailans i save kisim mani long em.

Inap olsem 85 pesen bilong PNG i planim kopi namel long gaden kaikai bilong ol o mekim plantesen bilong kopi.

Mista Kemish i tok ol liklik kopi fama long Hailans i gat bikpela luksave long wok bilong



PASIN: Ol papamama long Rongo Luteran Praimeri skul i bin soim pasin na luksave bilong ol long lokol memba bilong Lufa, Yawa Silupa taim em i kamap long skul long opim bilong nupela skul laiberi. *Poto: Sape Metta*

Lufa MP kirapim nupela laiberi bilding long Rongo

Sape Metta i raitim

EM i no man nating. Long planti toktok na tok pait long kisim ol gavman sevis na bringim ol developmen i go daun long ol liklik pipel long ilektoret bilong en, em i no save les na malolo.

Em i save pairap yet long palamen olsem na long dispela as pipel long distrik na ilektoret bilong en i save laikim em tumas na ol i gat bikipela amamas na luksave long em.

Lidaman Yawa Silupa, husat em i memba bilong Lufa em i dispela man.

Long dispela kain gutpela pasin bilong laikim tumas lidaman bilong ol, long Tunde wik i go pinis long taim Silupa i kamap long Rongo Luteran praimeri skul long Lufa distrik, ol papamama bi-

long ol skul pikinini long hap i bin karim em olsem wanpela king i go long gren sten we em i bin givim ol toktok olsem opisel ges spika bilong long henova, tekova seremoni bilong nupela laiberi bilding bilong dispela skul.

Na het masta bilong dispela skul Kelly Hosoyavi long taim em i bin kisim ki long Mista Silupa, i tok Rongo Luteran praimeri skul i bin kirap na stat yet long 1958.

Ol yia i kam na i go, tasol dispela skul i no bin kisim wanpela gutpela luksave i kam long olgeta level bilong gavman lokel, provinsel na nesanel level.

I kam inap long las yia na dispela yia, bihain long moa long faivpela ten (50pela) krismas, Lufa distrik administresen, aninit long lidasip

bilong Silupa, i bringim dispela nupela laiberi bilding i kam long dispela skul, Kelly Hosoyavi i tok.

Em i tok em i no amamas tru long dispela samting em lokel MP bilong ol i bringim i go long skul long wanem em i wanpela bikipela samting we ol skul pikinini long Rongo bai ken kisim na surikim save i go antap long dispela laiberi fasiliti.

Silupa, long taim em i hendim ova ki long skul, i tok dispela em i wanpela developmen dispela skul em i kisim.

Em i tok bai em i go het long givim han na helpim Rongo Luteran Praimeri skul long wanem em i laikim olsem dispela skul i mas kamap na ron gut wankain ol planti ol arapela skul long distrik na provins.

Zurenuoc bai lonsim wok senses long Isten Hailans

Isten Hailans em i laspela provins we bai kirapim wok senses o wok bilong kaunim ol manmeri na pikinini bihainim ol arapela wanpela ten nain (19pela) provins long PNG husat i bin kamapim pinis dispela wok long wanwan eria bilong ol.

Na provins i redi nau long kamapim Isten Hailans provinsel senses lonsing seremoni we bai kamap long biktaun bilong provins long Goroka tete (Fonde).

Ekting Sif Sekreteri bilong Nesenel Gavman, na Sekreteri bilong Provinsel na Lokol Level Gavman Afes, Manasupe Zurenuoc i bin bikipela long Goroka, na em yet bai kam olsem ges spika wantaim Senses Dairekta, Keith Rongap long taim bilong lonsim wok senses.

Deputi Provinsel Administrata, na Siaman bilong Isten Hailans Provinsel Senses Stiarng Komiti, (EHP CSC), John Gimiseve, i tok long namba wan miting o bung bilong ol komiti long Mande dispela wik, olsem wok senses na kaunim ol lain manmeri long olgeta kona bilong etpela distrik long provins, em i bikipela samting, long wanem bihain long dispela wok, opis bilong senses long provinsel na nesanel level bai ken kisim na

salim ol ap tu det namba na stori bilong olgeta manmeri long provins.

Em i tok long las tenpela yia long 2000, taim provins i bin kamapim wok senses, ol wokman i no bin wok i go long planti ol rural na bus ples we ol rot i bagarap na em i hat long wokabout o draivim ol kar i go long en.

"Long dispela as, planti ol manmeri i bin misaut long givim nem bilong ol. Na long dispela yia, mipela bai wokhat na bai mipela i strong long kisim nem bilong ol manmeri na traim long kamapim olgeta kona bilong provins," Gimeseve i tok.

Em i tok nau yet em wantaim ol komiti memba bilong EHP CSC i kamapim pinis mani plen long karim aut ol wok senses. Na mani mak komiti bai lukluk long yusim long dispela senses 2010 em bai kamap klostu long K5 milien.

Ol distrik long provins we bai ol senses opisa i wok i go long en, em Obura-Wonenara, Kainantu, Henganofi, Okapa, Lufa, Unggai, Bena, Daulo na Goroka distrik yet. Senses long Isten Hailans provins bai stat long Julai na i go olsem long Septemba, 2010.



RESI WOKIM: Hetmasta bilong Lufa Sekendari, Katina'e Aiten (hansut) i toktok long Memba bilong Lufa, Yawa Silupa long ol developmen i wok kamap long skul. Baksait em nupela kompyuta laborator i ol wok bildim i stap. Em bai gat 40 kompyuta masin bai ol sumatin i ken skul long en. *Poto: Sape Metta*

RESI kirapim Lufa Sekendari

SAPOS wanpela man husat i save i gat bikipela tingting long lukluk, bringim ol sevis na long wankain taim tu kirapim ol skul long elementri, praimeri, haikul, sekenderi skul na ol arapela edukesen institusen.

Em lida man na lokel MP na memba bilong Lufa long Isten Hailans Yawa Silupa tasol long taim em i bin kamap olsem memba long 2002 i kam inap nau em i kamapim pinis planti ol senis long ol skul na ol arapela developmen olsem ol rot, pawa, wara saplai, helt sevis, edukesen na ol arapela sekta tu long ilektoret bilong em.

Wanpela bikipela sevis na developmen we Silupa i bringim i go long distrik bilong en, em Rihebilitesen Edukesen Skul Infrastraksa (RESI) progrem. Nau yet aninit long dispela progrem Lufa Sekederi i kirap na wok long senis narakain we ol kainkain nupela bilding bilong skul olsem saiens na kompyuta laborator, domitori bilong ol man na meri sumatin haus slip bilong ol tisa na ol arapela bilding we bai skul i ken kisim helpim long en i wok long kirap.

Koli amamas long WIB ekspo

OL MERI na wimens grup lida husat i save i go pas long ronim ol kain kain bisnis long olgeta kona bilong PNG bai gat sans nau long putimaut ples klia ol bisnis samting em ol i save wokim long Women in Bisnis ekspo we bai kamap long Lae Morobe provins stat long Fraide dispela wik na i go pinis long Sande.

Planti long dispela ol bisniseri na ol lida bilong wanwan grup bilong ol meri i bin redim gut tru olgeta samting long stap long dispela ekspo.

Na wanpela mama em Koli Mathias, husat em i Presiden bilong Kafana Womens Koporetiv Sosaiti (KWKS) long Goroka, Isten Hailans provins, i tok em i amamas tru long ol lain manmeri husat i go pas long kamapim dispela tingting long putim ap Women in Bisnis ekspo long wanem planti ol meri na mama grup husat i save ronim ol bisnis bai i ken putimaut na soim ol bisnis samting em ol i save wokim long wanwan eria bilong ol.

Em i tok planti taim ol manmeri i no save long ol bisnis em ol meri i save kirapim na ronim. Na dispela ekspo em i bin wanpela gutpela samting we ol i putimaut na soim ol samting ol i wokim long save em papa God i givim ol long en.

"Olsem wanpela lidameri mi save kirapim planti ol gutpela tingting long helpim ol mama na ol yangpela meri tu long wokim ol kainkain bisnis na ol projek olsem somap, poltri (kakaruk) projek, agrikalsa na fam wok, wokim na salim ol bilum na ol arapela henkraf samting na ol arapela moa wok bisnis tu we ol yet bai i ken kamapim long helpim ol yet," Misis Mathias i tok.

Em i tok em i laikim olsem long olgeta yia dispela ekspo i mas kamap bai ol meri inap long kamap wantaim ol nupela aidia na tingting long kamapim ol nupela kain bisnis bai ken putimaut dispela ol samting long ekspo long olgeta yia.

Misis Mathias i tok nau yet grup bilong em i wok long redim gut ol kainkain samting we em yet bai karim i go daun long Lae long soim ol manmeri long ekspo.

Em i tok strong tu i go long ol lain husat i stap long atoriti long olgeta level bilong gavman na praivet sekta tu long ol i mas luksave na givim gutpela sapot long ol meri husat i save wok hat tru long bringim bisnis, sevis na tu developmen i go long ol komyuniti long wanwan hauslain, viles, taun na provins insait long PNG.



KAM SAPOT: Lo na Jastis redi long pilai.

DAUNBILO: Resis long kisim bal, NSL na FDL mekimsave long pilai long Primia Divisen long Praviat Netbal



HAPIM EM: Namba4 bilong Bataflai hapim wanpela fowet bilong Royals long A gret pilai bilong ol long PRL.

Pot Mosbi Soka Asosiesen (PMSA) Pri Sisen Dro

Gem 3

Sarere, Mas - 2010

Bisini 1

08:00	Badili CT Kings	vs	Dogura Rats	MP4
09:00	Dobo Murika	vs	PNG Fire	MP5
10:00	PJB Warriors	vs	Morobe United	MP7
11:00	Lamana	vs	Baggas	WP1
12:00	PNG Fire	vs	Mungkas 2	WP3
13:00	Kurti Andra	vs	Mungkas 1	MP2
14:00	Barai	vs	Snax Momase 1	MP1

Bisini 2

09:00	PNG Timbers	vs	Verave	MP5
10:00	Bavaroko	vs	SES United	MP7
11:00	Miga	vs	Verave	MP5
12:00	Mungkas 1	vs	LBC Defence	WP2
13:00	Moonbi	vs	LBC Defence 2	MP1
14:00	Kutu	vs	University 2	MP1
15:00	Guria	vs	Yamaros	MP8

Sande Mas 07 2010

Bisini 1

09:00	Naniu	vs	Nakemo	MP3
10:00	Musa	vs	Snax Momase	WP4
11:00	Keleiruna	vs	Hard Rocks	MP8
12:00	Mungkas 2	vs	LBC Defence 1	MP3
13:00	Musa	vs	Quando Nemba	MP6
14:00	University 1	vs	Naniu	MP3
15:00	Nakemo	vs	LBC Defence 1	MP3

Bisini 2

08:00	Baggas	vs	Murat	MP6
09:00	Simba United	vs	Rabuana	MP7
10:00	CSU Thrillers	vs	Enemi Babaka	WP2
11:00	ATW Sky Hawks	vs	Snax Momase	WP4
12:00	Snax Momase 2	vs	Bisana	MP4
13:00	Boroko United	vs	CSU Thrillers	MP2
14:00	Muiah Brothers	vs	Enemi Babaka	MP2

Bai: MP4 - Saints, MP6 - Dobo Warriors, MP8 - A Natuna, WP3 - Murat



HETPAS: Winga bilong Eastern Star Sato Modagai i kalap na rausim bal long het bilong Jeremy masalo bilong CMSS Taigas long NSL resis. CMSS i win 2-1



AUTIM MI: Pilaia bilong Dolphins i traime long ron i go long namba 2 beis tasol pilaia bilong Difens i traime long autim em. Difens win 11-6.

Ragbi lig long Amerika

Andrew Molen i raitim

RAGBI lig em i namba wan pilai bilong Papua Niugini.

Em i save kamap bikpela tu long Australia, Inglen (England), Nu Silan (New Zealand) na planti arapela kantri long Pasifik tu.

Ragbi lig i save kamap long ol arapela kantri tu tasol em i no bikpela pilai bilong ol tumas.

Planti bilong ol i save bihainim soka, ragbi yunion, ruls futbol, sofbol na besbol o ol arapela pilai bilong ol.

Wanpela bilong dispela kain ol kantri em Amerika, husat ol i gat planti kain spot long hap, tasol ragbi lig em i no strong tumas.

Ol spot we i save kamap strong long dispela bikpela kantri em soka, besbol, basketbol na Ameriken futbol o gridain (gridiron) we i klostu wankain olsem ragbi, tasol ol i save putim planti karamap long solda na bodi na tu long het bilong ol taim ol i pilai.

Stail bilong dispela pilai tu i no wankain tumas olsem ragbi lig tasol em i soim olsem ol manmeri long hap i gat laik long kain strongpela gem tu.

Namba wan taim tru ol Amerika i laik traim pilai ragbi lig em long 1953, taim ol i askim wanpela promotota, Mike Dimitro, long kamapim tim na mekim wanpela raun o tua (tour) i go long Australia na Nu Silan long pilai.

Dispela i bungim ol long wanpela bikpela tua tru na



PIKSA: Mak bilong nesenel ragbi lig tim bilong Amerika we i save pas long yunifom bilong ol.

ol i pilai 26 gem.

Nogat wanpela bilong dispela 22 pilaia long tim bilong Amerika i pilai ragbi lig bipo na ol i kamap long fil wantaim yunifom we i luk klostu olsem yunifom bilong gridain.

Ol i winim 6-pela gem na dro long tupela insait long dispela tua.

Long namba tu gem bilong ol long dispela tua we ol i pilaim wanpela tim bilong Sidni (Sydney), inap olsem 65, 453 manmeri kamap tasol bihain dispela namba i go daun taim ol i lukim olsem gem i no strong tumas.

Dispela tua i no kamapim wanpela gutpela samting long Amerika tasol Dimitro i no givap na i gat strongpela tingting yet long kamapim ragbi lig long Amerika.

Ragbi yunion tasol i bin kamap long Kalifonia (California) inap long 1939 we ol i bin raitim pas i go long Ragbi Futbol Lig (RFL) olsem ol i laik pilai ragbi lig.



GEM: Wanpela pilai namel long tupela tim long wanpela ragbi lig resis insait long Amerika.

RFL i redi long salim wanpela grup bilong ol i go long Kalifonia long soim ol rot bilong pilai ragbi lig tasol dispela i no kamap bilong wanem wol tu i bin kamap.

Bihain long Australia tua bilong ol long 1953, Dimitro i go pas long redim na kamapim tupela moa pilai agensim Australia na Nu Silan long Kalifonia tasol ol dispela tu i no mekim wanpela bikpela samting.

Amerika i bin salim wanpela tim i go pilai agensim Frens long Paris long 1954 tasol ol i bin lus 31-0.

Dimitro i strong yet long kirapim ragbi lig na i askim long holim 1960 wol kap long Amerika tasol i no bin kisim bilong wanem ol i nogat gutpela rekot long pilai.

Bihain long dispela, ragbi

lig i stop olgeta long kamap long Amerika inap planti yia bihain.

Long dispela taim inap nau, planti arapela ragbi lig pilai, trening na promosen wok bilong ragbi lig i save kamap long Amerika long traim na kamapim strong gem long hap.

Wanpela bilong dispela bikpela pilai i bin kamap long 1987 taim Nu Saut Wels (New South Wales) na Kwinslen (Queensland) i pilaim wanpela Stet ov Orisin gem bilong ol long Kalifonia.

Long 1989 tupela tim bilong Inglen, Wigan na Warrington i bin go pilai long Milwaukee.

American National Rugby League (AMNRL) i kamapim na ronim gutpela pilai resis bilong ol long

wanwan stet insait long Amerika.

Bipo long dispela, wanpela tim ol i kolim, "Adirondacks" we i stap long Nu Yok (New York) i save makim Amerika long ol pilai agensim Kanada (Canada) na ol arapela ples insait long dispela tupela kantri.

Tasol nau Amerika i gat tim bilong ol yet ol i kolim, "Tomahawks" we i save pilai makim stret Amerika.

Long 2008, South Sydney Rabbitohs bilong Australia i pilaim wanpela supa lig gem agensim Leeds Rhinos bilong Inglen long Jacksonville, Florida.

Leeds i bin go pas 26-0 bipo ol Souths i kam bek strong na klostu winim gem na i pinim skoa long 26-24 (Leeds i win).

Amerika i stap namba 15

ples long wol bihain long 2008 wol kap resis long Australia we i mekim ol i amamas tru.

Ol i stap aninit long Cook Ailans (14) na antap tasol long Serbia (16) na Japan (17).

Amerika i tokaut long profesenal ragbi lig resis bilong ol long 2009 ol i kolim "National Rugby League USA".

2010 bai namba wan yia bilong dispela resis we 8-pela tim bilong 8-pela siti bai stap insait long en.

Long kamap profesenal em i bikpela senis i kamap long ragbi lig long Amerika na ol i tokaut pinis long 6-pela tim; Philadelphia, New York, Boston, Denver, Jacksonville na Los Angeles.

I nogat planti kantri save gut tumas long ragbi lig na sapos em i kamap gut long Amerika, em bai gat sans long planti moa arapela kantri save gut moa long dispela spot bilong wanem olgeta i save lukluk long Amerika olsem bikpela kantri long wol we olgeta i save bihainim.

Em bai gutpela tu sapos PNG ken kamapim wanpela tua igo long kain ol kantri olsem Amerika na ol arapela long promotim ragbi lig na tu soim ol olsem dispela em i tru nesenel spot bilong PNG.

Wanpela pilaia bilong Amerika i tromoi bal long wanpela intansenel gem bilong ol.



Pes bilong PNG long Yut Olimpiks

Andrew Molen i raitim

SHANNON Andrew em bai namba wan man long kamap olsem pesman o ambedada (ambassador) bilong PNG long 2010 Yut Olimpik gems long Singapore (Singapo) long Ogas.

Em i wanpela bilong ol 30 pesman bilong wanwan kantri husat bai kamap long dispela pilai.

Namel long 205 kantri long wol, Intanesenel Olimpik Komiti (IOC) i makim 30 kantri long lonsim dispela program na salim ol pesman bilong ol i go long dispela pilai na PNG em wanpela bilong dispela ol kantri ol i makim.

"Mipela i amamas olsem IOC i makim PNG olsem wanpela bilong dispela 30 kantri bilong wanem em i givim gutpela luksave long yumi long dispela level," Rapilla i tok.

Andrew, 17 krismas, bai go long wanpela bung bilong ol dispela ambedada long Mas long Singapore na kam bek bipo em i go bek gen wantaim PNG tim long taim bilong pilai long Ogas 14 i go long 26.

"Dispela em i namba wan taim bilong mi long holim kain bikpela wok na luksave olsem.

"Mi amamas tru na tok tenkyu long

God na olgeta manmeri husat i mekim dispela i kamap long mi," Andrew i tok.

Andrew i save skul long Pot Mosbi intanesenel skul (PMIS) na i kepten bilong Hekari anda 21 tim long Mosbi pablik sevans soka.

Deputi Sekreteri Jenerel bilong PNG Spots Federesen an Olimpik (PNGS-FOC), Auvita Rapilla, i tok ol i makim Andrew long gutpela pasin em i save soim olsem lida long spot bilong em na long skul.

"Wok bilong em olsem yu ambedada long dispela gem em long stap insait long ol bung na pilai na luksave long ol pasin na kalsa bilong ol arapela kantri na ol samting em i lainim bai em i kam bek na ripot long en long mipela," Rapilla i tok.

"Astingting em long promotim kalsa na yut," em i tok.

Andrew bai no inap pilai long dispela Yut Olimpik Gems tasol em bai stap olsem wanpela memba bilong menesmen tim na bai wokbung wantaim "Chef de Mission" o man husat i go pas long tim.

Dispela em i namba wan taim bilong Yut Olimpik gems long kamap we ol etlit i gat krismas namel long 14 na 18 bai pilai.



PESMAN: Andrew gat bikpela amamas long makim PNG long namba wan yut olimpik gems we bai kamap long Singapore long Ogas dispela yia. POTO: Andrew Molen.

Inap olsem 3, 600 etlit na 1, 450 opisal bai kamap long dispela pilai.

PNG bai salim wanpela tim i go tasol nau yet ol spot we i redim tim pinis em soka wantaim anda 15 tim bilong ol meri na swimming wantaim etlit bilong ol, lan Nakmai.

Rapilla i tok ol i wetim yet etletiks, tenis ma wetlifting long redim ol pilai bilong ol.

Ol arapela spot olsem boksing i no kwolifai yet.

SPOT RAUN
WANTAIM
Scott Vavine, ML



Watpo na dispela kolum i save lukluk moa long Grasruts Spots?

TAIM mi bin stat rait long dispela niuspepa, na moa yet long dispela kolum bilong mi, mi bin givim planti tingting bilong mi long grasruts spot insait long kantri.

Wantaim save mi gat long stap wok wantaim spot insait long kantri, mi bin tingting long serim dispela save long helpim ol grasruts spot lida insait long kantri long kamapim komyuniti spot program bilong ol yet na yusim spot long bildim na strongim komyuniti bilong ol.

Mi bilip olsem 90 pesen long olgeta manmeri long kantri i stap long ol ruel eria. Planti long ol ples komyuniti i yusim spot olsem pilai bilong ol olgeta taim, na ol i wok long stap insait long en long soim strong na save bilong ol long ol distrik na provinsel gem.

Kisim ol rait manmeri long helpim na ogenaism komyuniti spot bilong ol yet i mas namba wan bikpela samting long ol komyuniti wok na pilai.

Em nau mi tok gen, spot em i wanpela bikpela samting long laip bilong yumi wan wan manmeri na komyuniti wantaim. Moa yet, long dispela taim nau, spot em ol i yusim long wol long salim toksave i go gut long ol lain manmeri i stap longwe tru.

Spot em samting we ol manmeri husat i kisim trening long stretim, i mas mekim gut. Tasol i sore tru olsem ol dispela lain i gat trening long dispeal wok, i no stap ples klia insait long ol komyuniti bilong yumi.

Em wanpela bikpela hevi tru i stap nau long kantri bilong yumi.

Mi gat strongpela bilip olsem yumi mas gat ol savemanmeri bilong spot insait long ol komyuniti long helpim ol pipel long ogenaism o stretim gut ol komyuniti spot. Ol lain husat i nogat fomal trening long mekim dispela, bai no inap mekim gut dispela wok.

Taim spot insait long komyuniti i no sanap gut, ol pipel yet bai no inap save long ol veliu na gutpela bilong spot. Em nau, spot bai no inap mekim gutpela wok insait long ol komyuniti long daunim ol hevi i stap.

Dispela niuspepa, aninit long dispela kolum bilong mi, i save givim wanpela klia toksave i go long olgeta spotmanmeri long kantri i stap long ol ruel eria long kantri.

Dispela niuspepa i save givim moa skul toksave i go long ol komyuniti spot lida. Yu traim kisim dispela pepa na ritim dispela kolum. Bihain long yu ritim sampela ol kolum mi save raitim, bai yu gat bilip long yusim dispela infomesen long stretim gut komyuniti spot bilong yu. Sapos yu ritim moa, bai yu praktis moa, na bai yu gat moa strong long spot bilong yu.

Stia tok bilong mi long yupela, em long ritim dispela kolum yet, long wanem bai yu no inap painim dispela kain tok stia long narapela ol niuspepa long kantri.

Pilai long ais



WEL TASOL: Larisa Yurkiw bilong Kanada i ron long wanpela trening bilong em antap long ais long redi long winta olimpik resis we i kamap nau long kantri bilong em.

Winta Olimpiks i save kamap long ol kantri we i gat ais na bikpela kol na ol spot we i save kamap em kain olsem dispela we Yurkiw i pilai long en na ol arapela we i save kamap antap long ais.



Melbourne winim klap salens

MELBOURNE Storm bilong Australia i kamap namba wan tim bilong Australia long winim tupela ragbi lig wol klap salens bihain long ol i winim Leeds Rhinos 18-10 long Elland Road long Sande.

Storm kepten, Cameron Smith i kisim 10-pela poin long ol kik bilong em na bungim wantaim ol trai kam long Luke MacDougal na Anthony Quinn long karim trofi go bek long Australia.

Ol i bin lus long Leeds 11-4 long 2008 na dispela yia i ol i bekim dispela dinau.

Strongpela gem i lukim tupela tim pas 4-4 long hap taim tasol long namba tu hap, ol i stat long tromoi bal i go i kam na ol trai kamap.

Storm nau em ol klap sempion bilong wol.



S P O T S



Isu 1855

Wan wik: Fonde, Mas 4 - 10, 2010.

free K3 credits every week

Leave your bemoobile phone switched on and we'll text you every week in March with your weekly FREE K3 Credit. * Conditions apply

bemobile toktok moa

Warriors kam bek

SIMBU Warriors bai stap insait long PNG Nesanel Ragbi Lig resis bihain long ol i kisim tok orait dispela yia long stap insait long bemoobile kap resis.

Laspela taim ol i stap insait long PNGNRL em long 2007 insait long SP kap resis aninit long nem; "Pagini Warriors."

Nau wantaim nupela bod, sapot bilong ol Simbu manmeri na gutpela tingting bilong pilai, Warriors i kam bek gen na ol i gat strongpela tingting long stap strong insait long resis dispela taim.

WET IPINIS: Wet bilong ol Warriors i pinis na dispela yia bai ol i ken pilai gen long bikpela ragbi lig resis bilong PNG. WANTOK POTO.

NISSAN URVAN

Feveret PMV Bilong PNG

DRIVIM IGO K69,900

Winim FRI URVAN

- 3.0 Lita Diesel Engin
- 5 Spid Manuel Transmisen
- Mor Pasindia Hetrum
- Redieta stap wan mita bihain long frant bampa

Taim yu baim URVAN Bus bai yu gat sans long go insait long dro long winim ***FRI URVAN**

PROMOSEN BAI PINIS 31st MARCH 2010
* Terns na Condisen Aplai

• Igat Freit Sas long sampela Proovins

NISSAN SHIFT the way you move *Piksa bilong edvetismen tasol.*

BOROKO MOTORS

PORT MORESBY LAE MT HAGEN TABUUL
PH: 325 5255 PH: 472 1144 PH: 542 1533 PH: 649 9048

KIMBE MADANG RABAU
PH: 583 5035 PH: 422 2638 PH: 582 6193

Website: www.boroko-motors.com